

Diika' ben postlka'

Bcheb Jesúza' wse lee Espíritu Sántona'

¹ Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsdile' dezd ka wzoloe' ² axt ka bllin lla biyep'e' yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'. ³ Na' ka wde wite' na' bibane' ladj ben' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wnabia' che Chioza'.

⁴ Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. ⁵ Dii li Juanna' bchoe' ben' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶ Na' ben'ka' ndop nllag kwit Jesúza', wnabgakile'ne':

—Xan', ¿awibejo' cho' ben' Israel lo ni'a na' ben' zit'ka' naa kwenche inabi'o neto'?

⁷ Na' Jesúza' golle' legake':

—Bi chidol'le inezile bi lla bi gor gon Xacho Chioza' daa gone', la' toze' len' chnabi'e na' ba bllie' bia' batan gone'n.

⁸ Na' ka yidsoa Espíritu Sántona' loo yichjlall'do'lena' na' gone' le' yel' wak, na' we'le xtillaana' yell Jerusalénna', na' doxen gani mbani Judeani na' lekzka' gana' mbani Samáriana', na' doxen zbii zkaan yell-lioni.

⁹ Na' ka biyoll golle' ka', wzolo biyep'e' yabana' chwiate ben'ka', na' wze to bej bkwashaan le' na' bich

ble'gakile'ne'. ¹⁰ Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. ¹¹ Na' gollgake':

—Le' ben' Galilea, ¿berache chwiazle yabana'? Kwin Jesúza', beena' ble'ile bichej ladjleni na' biyep'e yabana', kakzan ile'ilene' yiyede'.

Wlejgake' Matíaza' bizoe' lo laz Juda'

¹² Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'. ¹³ Na' ka billingake' Jerusalénna', biyepgake' yooná' lliá shkwiana' cha'lə gana' zoagake'. Na' ben'kin billin: Pédróna', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas ben' bish' Jacóbona'.* ¹⁴ Yog' ben'ki chdopgake' yog' lla kon ben'ka' nak ben' bish' Jesúza' kwenche choe'llwillgake' Chioza', na' len Maríana' xna Jesúza' na' zi' bal' noolka'.

¹⁵ Na' llaka' wzoagake' na', Pédróna' wzie' ladj ben'ka' chonlilall'gake' Jesucrístoná', nakgake' ka do to guioa galjə, na' golle' legake':

¹⁶ —Le' ben' bish', benan byen billinin ka goll Espíritu Sántóna' dii Davina' na' bzeje'n lee Cho'a Xtil' Chioza'. Bi'e dill' nakan gon Juda', beena' bchi'e ben'ka' bex'gake' Jesúza'. ¹⁷ Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'. ¹⁸ Na' mecha' daa bexee che dii mala' daa bene', lennan' biziile' to yell-lío gana' bxope' de gozyichjlə na' goshj li'ena' na' bchej yog' xjloe'na'. ¹⁹ Na' ka wnezi ben' Jerusalénka' ka gok che Juda', na' bsi'gake' yell-liona' daa bizi'e Acéldama

* ^{1:13} Ben' bish' Jacóbona': ben'ka' nsed nagake' chiyal' inan xiin Jacóbona'.

de xtill'gake', na' zejın Yell-lıo Chen. ²⁰ La' lee libr çe Sálmoka' nan:

Yıdesh yıloashga lıll xlatje'na',

na' nı sto kochno soan.

Na' lekzka' nan:

Ben' yoblə yıyakshga lo nee daa nan gok lo nee gone'.

²¹ Na' chonan byen kwejcho to ben'ki bengake' cho' txen toshiizi kana' wzoalen Xancho Jesúza' cho', ²² ben'ki nakgake' cho' txen dezđ ka bchoa Juanna' Jesúza' nısa' axt ka bıyepel' yabana', kwençe gone' cho' txen we'cho dıll' nakan gok bıban Jesúza' ladj ben' wetka'.

²³ Na'ch wlejgake' çhope': toe' le Matías, na' sto ben' yoo shonə leyın, José, Barsabás, na'ch Justo. ²⁴ Na' be'lıwillgake' Chioza', çe'gake':

—Chios, ben' nak Xannto', lı' nombı'o yıçıjıllal'do' yog' ben'. Blıyı neto' no ben'ki çhop ba wlejo' ²⁵ kwençe gake' neto' txen naknto' postl, la' Juda' ba bnıte' daa ndolee yeı' wen dıı mal çe'na' na' ziyaje' latja' gana' çıdıleel'.

²⁶ Na'ch bengake' to wyıtj kwençe wnezgakıle' noran ba wlej Chioza', na' bıdol' Matıaza', na' wlene' postlka' shnej.

2

Ka bıđ Espıritu Sántonı'

¹ Na' ka bıllın lla gol' lıı Pentecostéza', yog' ben'ka' çonlılall'gake' Jesúza' tozga ndop nıllaggake'. ² Na' tokonganzi bengakıle' to sshag ka ga za' to be' wal, za'n yabalə na' wıııı doxen loo yooıa' gana' lle'gake'. ³ Na'ch ble'gakıle' dıı nak ka beı yi' çal'ıııııııııı, na' yog'ze' zen yıçıje'ka'. ⁴ Na' Espıritu Santo çe Chioza' wyo'e loo yıçıjıllal'do' to toe', na' wzologake' wıııııııııı wde wdelı dıll', kon ka gokıllal' Espıritu Sántonı' ıııe to toe'.

⁵ Na' lo llana' ben' zan ben' Israelka' lle' Jerusaléna' choe'la'ogake' Chioza', no ben' zaak wde wdeli yell dii lle' yell-lioni. ⁶ Na' ka bengakile' sshaga' daa chak, na' bdop bllaggake' gana' chak ka'. Na' gokllej gokgangakile' ka biyombia'gake' xtilleeka' daa chne ben'ka' lle' na'. ⁷ Na' le chibangakile', na' che' ljwelle':

—¿Aaga ben' Galilea yog' ben'ki choe' dill'ki? ⁸ ¿Nakra chak chakzgake' dill'ka' chne to tocho, lla? ⁹ La' ni zoa ben' Partia, ben' Media, ben' Elam, ben' Mesopotamia, ben' Judea, ben' Capadocia, ben' Ponto, ben' Asia, ¹⁰ ben' Frigia na' Panfilia, ben' Egipto na' zi bale' ben' África, ben' zaak gaozə yell Cirénena', na' lekzka' len ben' za' Rómana'te. Balcho nakcho ben' Israel, na' zi balcho choncho ben' Israelki txen. ¹¹ Na' lekzka' zoa ben' Creta na' ben' Arabia. Na' yog'techo chenicho chne ben'ki xtill' to tocho, choe'gake' dill' che dii wenka' ba ben Chioza', diika' chonan ka yibanicho.

¹² Na' yog' ben'ka' bdop bllag na', bibangakile' na' gokllej gokgangakile'. Na' che' ljwellgake':

—¿Bi zejin dga, lla?

¹³ Na' bale' wnelegakile' legake', nagake':

—Zolli ben'kin.

Daa goll Pédrona' ben'ka' bdop bllag

¹⁴ Na'ch Pédrona' wzechaile' len postlka' zi shnej, na' wnie' zillj chi'e ben'ka' ndop nllag na':

—Le' ben' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga inia' le'. ¹⁵ Ben'ki nak' txen aga zollgakilen' ka chza'lall'zle, la' shzilgaz naa. ¹⁶ Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

¹⁷ Kat' ba zoa illin lla te che yell-lioni,

nad' Chios wi'a Espíritu cha'na' soe' loo yichjall'do'
ben'ka' lle' zbii zkaan yell-lioni.

Na' gon' kwenche xiinleka', ka bi' byo na' ka bi' noolə,
chixje'gakb' daa yep'gakb'.

Na' bi' wew'ka' ile'do'gakib',
na' ben' golka' inegakile' yel.

¹⁸ Na' ka'kzə wi'a Espíritu cha'na' yog' ben'ka'
choe'la'ogake' nad' llana' gak ka', ka ben' byo
ka noolə,

na' we'gake' dill'ka' wxo'a cho'a lolleeka'.

¹⁹ Na' xan yabana' wli'a dii gonan ka yibani ben',

na' ka'kzə lo yell-lioni

wli'gakidee chen, na' yi', na' llen.

²⁰ Wbilla' bich wzeeni'n,

na' bewaa yiyakan xna ka chen

ka zi' illin lla choo lla xen che Xanchona'.

²¹ Na' nottez ben' inabile' Xancho Chioza' gaklene'ne', na'
yisle'ne' kwenche bi kwiayee.

²² 'Na' le' nakle ben' Israel, li wzenag dga inia' le'.
Nezkzile Chioza' wleje' Jesús, ben' Nazareta', daa bi'ene'
yel' wñabia'na' kwenche bidylene' ladjleni dii zan yel' wak
choo yel' wak xen na' bichlə dii benan ka bibani ben'.

²³ Na' beeni goke' lall' na'le kon ka bllia Chioza' bia' gak
che', na' béx'lene' bénlene' lo na' ben' malka' kwenche
betgake'ne' lee yag cruza'. ²⁴ Per Chioza' bisbane'ne' ladj
ben' wetka', na' bi bi'e latj guete' toshiizi, daa bi gok
inabia' yel' wita' le'. ²⁵ Dii Davina' bi'e dill' che Jesúza'
kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

²⁶ Daan le chibayi lall'dawaani na' cho'a dill' ka mbalaz
zoa'.

Na' beli chen cha'ni nonan lez yibanan,

²⁷ la' aga wsanlalloo nad' toshiizi ladj ben' wetka',
ni bi wi'o latj gooll' iteb beli chen cha'ni daa nak' lall' no'.

²⁸ Ba bliilo' nad' nakan nak neza' sho'a kwenche gat'ch yel'
mban cha',

na' yiba yizakid' daa soalen' li' toshiizi.

²⁹ 'Le' ben' bish', nezczicho dii xoxzto'cho Davina'
wite' na' bkwash'gake'ne', na' ni nakbia'te naa gana'
bkwash'gake'ne'. ³⁰ Na' dii Davina' bi'e dill' diika' goll
Chioza' le', na' wnezile' kwinqwin Chioza' bchebe' wzoe' to xiin
dia' che' inabi'e. ³¹ Chioza' bliile' dii Davina' diika' zi' gak
che Crístona', na' bi'e dill' yibane' ladj ben' wetka' ka wne'
aga wigaane' ladj ben' wetka' na' ni bi gooll' iteb beli chen
che'na'. ³² Na' ka' gok, Chioza' bisbane' Jesúsza' ladj ben'
wetka', na' yog'nto' ble'into'ne' na' choe'nto' dill' bibane'.
³³ Na' ka biyoll bigoyoe'ne' yabana' na' wlekwe'ne' kwite'
de shlina', bene' lo nee bselee Espíritu Sántona' ladjnto'ni
ka bchebe'. Na' Espíritu Sántona' ba bene' yog' dga ba ben
ble'ile naa. ³⁴ Bi gakile dii Davinan' biyepe' yabana', la'
kwine', wne':

Xancho Chioza' golle' Xan'na':

“Wche' kwit' de shli ni

³⁵ shlak wzoa' xni'ona' ben'ka' chakzbani li'.”

³⁶ 'Na' nia' le', yog'cho cho' ben' Israel chiya' inezicho,
Jesúza', beena' betle lee yag cruza', Chioza' bzoe'ne' nake'
Xancho, na' len' Crístona', beena' wlej Chioza' inabi'e
cho'.

³⁷ Na' ben'ka' lle' na' ka bengakile' goll Pédrona' legake'
ka', le nyesh'chga gokgakile', na' wñabgakile' Pédrona'
na' postlka' sto, che'gake':

—Le' ben' bish', ¿beran chiya' gonnto' shka'?

³⁸ Na'ch Pédrona' chi'e legake':

—To tole, *li* yiyaj yileni na' *li* *choa* nisa' shi ba *chonli-*
*lall'*le Jesucristona', na' yiyakxen *xto*'leka' na' yidsoa Es-
 píritu Sántona' *loo* yichjlall'do'lena'. ³⁹Chioza' ba *bchebe'*
 gone' le Espíritu *che*'na', na' len *xiinleka'*, na' nottez
ben' zit'. *La'* *nchebe'* wi'ene' *yog'* *ben'* *gaxe'* *kwenche*
*gonlilall'*gake'ne'.

⁴⁰Na' dii zanch dill' be'len Pédrona' *legake'*, got'yoile'
legake', *chi'e*:

—*Li* yisla *kwinle* lao *yel'* *zi*'na' daa *ile'i* *ben'* *wen* dii
malka' *bi* *chajle'* *che* Chioza'.

⁴¹Na' *ben'*ka' *wyajle'* daa *goll* Pédrona' *wchoagake'*
nisa'; na' lo *llana'* *shona* mil *ben'*ka' *wlengake'* *ben'*ka'
nonlilall' Jesúza'.

*Ka ben ben'*ka' *benlilall'* Jesucristona' dii *nech*

⁴²Na' *yog'*gake' *wzegake'* *wneyi* *bengake'* *diika'* *bli'*
bsedi *postlka'* *legake'*, na' *xochi* *wzoagake'*. Na' *bdop*
bllaggake' be'*lwillgake'* Chioza' na' *weej* *wdaogake'* *txen*.

⁴³Na' *yog'*ze' *bibani* daa *ble'*gakile' *yel'* *wak* *zanka'* *ben*
postlka'. ⁴⁴Na' *yog'* *ben'*ka' *chonlilall'*gake' Jesúza' *gok-*
gake' *toz*, na' *choe'* *ljwelle'* *bi* ka dii *chyllji* *to* toe'. ⁴⁵Na'
biyit' *bidegake'* *no* *yell-lio*, *no* *yoo* *chegake'* *wa* *bichlā* dii
napgake' na' *choe'* *ljwellgake'* *ka* *to* dii *chyllji* *to* toe'.

⁴⁶Na' *yog'* *lla* *bdopgake'* *lesh'* *chyoodo'*na' *choe'*lwillgake'
 Chioza', na' *lekzka'* *bibagakile'* *weej* *wdaogake'* *txen*
lill *ljwellgake'*. ⁴⁷Na' *wzoatezi* *wzoagake'* be'*la'*ogake'
 Chioza' na' *yog'*zə *ben'* *gokbe'*gakile' *ka* *mba* *chongake'*.

Na' *yog'* *lla*, *Xancho* Chioza' *bene'* *ka* *wyanch* *ben'*ka'
benlilall' Jesucristona'.

3

Biyaki to ben' *bi* *chak* sa'

¹ To lla do ka chida shonə shlle'na', ka gora' chdop chllag ben' Israelka' choe'lwillgake' Chioza', Pédrona' len Juanna' wyajgake' yoodo'na'. ² Na' cho'a puert che zeena' daa nechj yoodo'na', puert daa nsi'gake' Puert Xochi, chi' to ben' nxinj ni'ena' ka goljtie'. Na' yog' lla chjlekgake'ne' na' kwenche chnabe' karidá lao ben'ka' chdop chllag yoodo'na'. ³ Na' ka bllin Pédrona' na' Juanna' gana' chi'e, na' wnable' legake' izangakile' lat' mech we'gake'ne'. ⁴ Na'ch Pédrona' len Juanna' bwiagake'ne', na' Pédrona' golle'ne':

—Bwiakachi neto'.

⁵ Na' beena' bwie' legake', gokile' mechan' we'gake'ne'.

⁶ Na' Pédrona' chi'ene':

—Bibi mech nap' gon' li', lete dii nap' gon' li'. Kon ye'l' wak che Jesucristo, ben' Nazareta', nia' li' bizolla' na' bigoo nez.

⁷ Na'ch Pédrona' wdoyoe' nee de shlina' na' bisolléene', na' lii biyakteyi ni'ena'. ⁸ Na'ch ka ben' bxit'zə bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'. ⁹ Na' yog' ben'ka' lle' na' ble'gakile'ne' chde' choe'lawee Chioza', ¹⁰ na' billej bibangakile' daa nombia'gake'ne' chbi'e chnabe' karidá cho'a puert daa nsi'gake' Puert Xochi.

Bzajonii Pédrona' ben'ka' ndop nllag lesh' chyoodo'na'

¹¹ Na' beena' biyaki ni'ena' aga bsane' Pédrona' len Juanna', kon noe' legake'. Na' yog' ben'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor che dii Salomón gana' zelengake' beena' biyaki. ¹² Na' ka ble'i Pédrona' ben'ka' chdop chllag na', golle' legake':

—Le' ben' Israel, ¿berache chibanzile daa biyaki beeni? ¿Na' berache chwiazle neto'? ¿Achakile kon ye'l' wak

chento'nan' biyaki beeni? ¿Awa chakile daa zoanto' chon-
 nto' ka chiyoollalii Chiozan' biyakile'? Aga daan. ¹³ Chios,
 beena' be'la'o dii Abrahama', dii Isaaca', dii Jacoba', na'
 nochlæ dii xozto'choka', len' wlo'e Xiine' Jesúza' balaan
 xenna', beena' benle lo na' ben'ka' betgake'ne'. Na' ka
 goklall' Pilátona' yisane'ne', bi be'le latj. ¹⁴ Lwaa dii nan
 inable yisane' Jesúza', beena' nak liizelozi ben' li ben'
 shao', ben' wen xyana'læ wnable bisane'. ¹⁵ Kan' benle
 betle Jesúza', beena' chon yel' mban daa nak dowalj. Per
 Chioza' bisbane'ne' ladj ben' wetka', na' neto' choe'nto'
 dill' daa nezinto' bibane'. ¹⁶ Daa chonlilall'nto' Jesúzan',
 ba biyaki beeni chwiale na' nombia'le. Dii li, daa nonli-
 lall'nto' Jesúzan' chwiatele ba biyakchaile'.

¹⁷ 'Le' ben' bish', nezid', ka le' na' ka ben'ka' chnabia' le',
 bi gokbe'ile bin benle ka betle Jesúza'. ¹⁸ Na' Chioza' bi'e
 latj gok ka' kwenche billinin ka wna dii ben'ka' wdixjee
 xtilleena' kani'yi, daa wngake' Crístona' biya dii wchi'
 wsak' ben' le'. ¹⁹ Na' naa, li wzenag che Xancho Chioza',
 na' li yiyaj yileni dii malka' chonle kwenche yizi'xene'
 chele na' wzoe' le' mbalaz. ²⁰ Na' yiselee Crístona', beena'
 wleje' kwenche inabi'e, kon ka wdixjee dii ben'ka' kani'yi.
²¹ Chonan byen yigaane' yabana' axt ka illin lla yiyonshao'
 Chioza' yog'lojte dii de, kon ka goll Chioza' dii ben'ka'
 wleje' wdixje'gake' cho'a xtilleena' kani'yi. ²² La' dii
 Moiséza' golle' dii xozxto'choka' dill'ki: "Xancho Chioza'
 kweje' sto ben' ka nad' ladjleni, ben' chixje'ile' le' bi dill'
 we'lene'ne'. Na' li wzenag yog' daa ine'. ²³ Na' beena' bi
 wzenag che', Chioza' kwej yichje'ne' na' bich gak gone'
 txen ben'ka' nak yell che Chioza'."

²⁴ 'Na' yog'loj dii ben'ka' wdixjee daa goll Chioza'
 legake' kani'yi, wzolozan kon dii Samuela', wdixje'gake'
 gak diiki chak naa. ²⁵ Len', naki chele daa ba bcheb
 Chioza' lao dii ben'ka' wdixjee daa golle' legake' kani'yi.

Na' lekzka' naki chele dii wenna' daa bcheb Chioza' gone' che dii xoxto'cho Abrahamama', ka golle'ne': "Ni che xiin dia cho'na' gon' dii wen che yog'lol ben' lle' zbii zkaan yell-lioni." ²⁶ Na' ka bsel' Chioza' Xiine' Jesúza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

4

Pédrona' len Juanna' gokgake' lo na' ben'ka' chnabia' ben' Israelka'

¹ Na' ni choe'lente Pédrona' len Juanna' ben'ka' dill' ka bllin bxozka' len beena' ngoo lo nee ben'ka' chap yoodo'na' na' len zi bal saduceoka'. ² Le chllaagake' daa chli' chsedi Pédrona' len Juanna' ben'ka' lle' na' nakan gok biban Jesúza' ladj ben' wetka'. ³ Na'ch bex'gake' legake', na' daa ba wlle', jloogake' legake' lillyana', axt betiyoch bibejgake' legake'. ⁴ Per ben' zan ben'ka' bzenaggake' dillaa be' Pédrona' len Juanna' ben'ilall'gake' Jesúza'. Na' ka', wyanch ben'ka' ben'ilall'gake'ne', na' gokgake' ka do gayaa mil to ben' byoka'zə.

⁵ Na' betiyo bidop billag ben'ka' chnabia' ben' Israelka' yell Jerusalénna', len ben' golka' chnabia', na' ben'ka' chli' chsedi leya'. ⁶ Na' lekzka' len Anáza', beena' nak bxoz choo bxoz xen, na' Caifáza', Juanna', Alejándrona', na' nokchlə ben'ka' nak dialla che bxoz choo bxoz xenna'. ⁷ Na'ch bzegake' Pédrona' len Juanna' gchole'ka', na' wnabgakile' legake':

—¿No lsens cheyi na' no bsel' le' chonle diiki?

⁸ Na' Espiritu Santo che Chioza' bzajniile' Pédrona' kwenche golle' legake' ki:

—Le' ben' wnabia', na' le' ben' gol chnabia'le yell Israeli, ⁹ chnabile neto' ka nak dii wenna' gok che beeni, na' cheenile inezile nakan gok biyakile'. ¹⁰ Cheeninto'

yog'lol-le inezile na' yog'lol ben' Israelka' inezgakile', beeni chwiale ze laoleni biyakile' kon ye! wak che Jesucristo, ben' Nazareta', beena' betle lee yag cruza', per Chioza' bisbane'ne' ladj ben' wetka'. ¹¹ Che Jesúzan' choe'n dill' daa nan “yaja' daa bi wyoolall'le le' nakle wen yoo, leyen'lannan' yaja' daa ba nchejcha yooná.” ¹² Bichga zoa sto ben' yoblə gak yisle' cho' kwenche bi kwiayi'cho. La' kochno zoa doxen yell-lioni ben' ba wlej Chioza' kwenche yisle' cho'.

¹³ Le bibani ben' wñabia'ka' daa chwiagake' bi blleb Pédróna' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúza' txenan chongake' ka'. ¹⁴ Na' daa ze beena' biyaki ni'ena' kwite'ka', bibi gok ye'gake' legake'. ¹⁵ Na'ch bibejgake' legake' shlak be'len ljwellgake' dill' nak koogake' xnezin. ¹⁶ Che' ljwelle':

—¿Nakra goncho che ben'ki? La' yog'zə ben' zoa Jerusalénni inezgakile' ba bengake' to ye! wak xen, na' aga wak inacho bi nakan ka'. ¹⁷ Na' kwenche bich ides dill'ka' choe'gake', chiyal' kooshebchogake' kwenche kochno we'lengake' dill' che Jesúza'.

¹⁸ Na'ch goxgake' Pédróna' len Juanna' dii yoblə, na' gollgake' legake' bich wli' wsedgakile' ben' ni bi we'lengake' legake' xtill' Jesúza'. ¹⁹ Na' Pédróna' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. ²⁰ Bi gak wsannto' we'nto' dill' daa ben ble'into' che Jesúza'.

²¹ Na'ch ben' wñabia'ka' biya dii gollgake' legake' kwenche nan illebgake', na'ch bisanchokləgake' legake', la' bibi billet-lall'gake' gongake' daa yog'zə ben' choe'la'ogake' Chioza' ni che daa gok. ²² Na' beena'

biyaki ni'ena' kon yel' wak che Jesúsza' ba wdeile' choa yiz.

Wnabgakile' Chioza' gaklene' legake' we'gake' xtilleena'

²³ Na' ka bisangake' Pédróna' len Juanna', biyajgake' gana' zoa ben'ka' nonlengake' txen na' gollgake' legake' yog' daa goll bxoza' chnabia' na' ben' golka' chnabia'.

²⁴ Na' ka bengakile' daa gollgake' legake', na'ch gokgake' toz be'llwillgake' Chioza', che'gake':

—Chios, li' nako' ben' zeelo chnabia'. Li' beno' yabana', yell-lioni, na' niso'na', na' yog'te dii de lo yell-lioni.

²⁵ Na' Espíritu Santo cho'na' bxoe' dill'ki cho'a loll' dii Davina' kana' wne':

¿Berache chllaa chlozk ben' yell-lioki?

¿Berache toshiizi chgoo ben'ki xnezin gongake' daa bi nxe bi nzak'?

²⁶ Ben'ka' chnabia' lo yell-lioni gokgake' toz gokzbangakile' na' bñiatezgake' Xancho Chioza' len Crístona', beena' wleje' kwenche inabi'e.

²⁷ 'Dii li yell Jerusalénni Heródeza' na' Poncio Pilátóna', len ben' zit'ka' na' ben' Israelka', bdop bllaggake' gokgake' toz goklall'gake' wlliyi'gake' Jesúsza', beena' nak liizelozi ben' li ben' shao', beena' wlejo' kwenche inabi'e.

²⁸ Na' daa bengake' ka', gok ka bllio' bia'. ²⁹ Na' naa Chios, bwia ka ngoosheb ben' wnabia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'. ³⁰ Bli' yel' wak cho'na' kwenche yiyaki ben' bi shao' na' kwenche gonnto' bichlæ dii yibani ben' kon yel' wak che Xiino' Jesúsza', beena' nak liizelozi ben' li ben' shao'.

³¹ Na' ka biyoll be'llwillgake' Chioza', wxo' wnib latja' gana' ndop nllaggake', na' wnabia'chga Espíritu Sántóna' legake' na' bi bllebgake' we'gake' cho'a xtil' Chioza'.

Daa de che to toe' benin che yoguee

³² Na' yog' ben'ka' ba chonlilall' Jesúza', toz ka gok yichjlall'do'eka'. Na' yog' daa de che to toe', benin che yoguee. Ni toe' bi wna: “Cha' dga.” ³³ Na' postlka', kon yel' wak xen che Chioza', be'chgake' dill' che Xancho Jesúza' daa bibane' ladj ben' wetka', na' Chioza' dii xen goklene' yog'lóle'. ³⁴ Na' ni toe' bibi byallji, la' beena' de yell-lío che' wa lille' na' chiyiteen, na' mecha' daa choxee cheyin ³⁵ cho'en postlka' kwenche choe'gake' kon ka'k' wej chyallji to toe'. ³⁶ Na' wzoa to ben' Chipre lie' José. Nake' dia che dii Levína', na' postlka' bsi'gake'ne' Bernabé, na' zejin witip lall' ben'. ³⁷ Na' Joséni biyitee to yell-lío dii nape', na' mecha' bi'en postlka'.

5

Ananíaza' na' Safirana' wxiye'gake'

¹ Na' wzoa to ben' wlie' Ananías, na' xoole'na' wlie' Safira, na' biyit'gake' shkwe' yell-lío che'ka'. ² Na' Ananíaza' len xoole'na' gokgake' toz bkwaangake' lat' mecha' na' bentezgake' ka be' doxenan postlka'. ³ Na'ch Pédróna' golle'ne':

—Ananías, ¿berache be'zo' latj wñabia' Satanáza' yichjlall'do'na' na' chakilo' siyoo Espíritu Sántóna' daa bgaanleno' lat' mecha' daa wdixjgake' che yell-lío cho'na'? ⁴ Cho' yell-líona' kana' zi' yiyitoo, na' cho' mecha' daa be'xoo cheyin ka biyitoo. ¿Berache wloolza' yichjlall'do'na' siyoo? Aga ben' yell-líonin chziyoo, san Chiozan' cheenilo' siyoo.

⁵ Na'ch ka beni Ananíaza' daa goll Pédróna', to ka billeeze' wite'. Na' le blleb yog' ben'ka' wñezi ka gok che'. ⁶ Na' bllin to chop bi' wew' gana' chtol Ananíaza', na' bitobgakbee to lech' na' jakwash'gakbee.

⁷ Na' gok ka do shon gor ka bllin xoole'na', aga nezile' bin ba gok che ben' che'na'. ⁸ Na' wñabi Pédróna'ne', chi'ene':

—Wnashki nad', ¿aka to nakz ben' cho'na'n biyit'le yell-lio chelena'?

Na' Saffrana' chi'ene':

—Awe, ka't'kzan biyit'nto'n.

⁹ Na'ch che' Pédróna'ne':

—¿Berache benzle toz dill' kon ben' cho'na' chakile wak siye'le Espíritu che Chioza'? Cho'a yooni ba ziza' bi'ka' jakwash'gakb' dii ben' cho'na', na' naa lljakwash'gakb' li'.

¹⁰ Na' lii billeete Saffrana' wite' lao Pédróna'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii ben' che'na'. ¹¹ Na' le blleb ben'ka' nonlilall' Jesucristóna' len yog' ben'ka' wñezi ka gok che dii Ananíaza' na' dii Saffrana'.

Postlka' bengake' dii zan ye! wak

¹² Na' postlka' bengake' dii zan ye! wak na' bichlə dii chonan ka yibani ben' ladj ben'ka' lle' Jerusalénna'. Na' yog' ben'ka' chonlilall' Jesúsza' chdop chillaggake' loo koridor che yoodo'na' daa le Koridor che dii Salomón.

¹³ Na' nochlə ben'ka' aga biyaxjgakile' gongake' legake' txen, la'kzi le ble'shiigakile' legake'. ¹⁴ Na' ben' zan, ka noolə ka ben' byo, benlilall'gake' Xancho Jesúsza'. ¹⁵ Na' chyixjgake' tnezka' ben'ka' bi shao', nxoogake' legake' no lo yagla' na' no lo daa, kwenche kat' te Pédróna' la'ch' bñen che'na' ten gana' degake' na' yiyakgakile'. ¹⁶ Na' lekzka' zan ben' yellka' lliá gaozə Jerusalénna' chajgake' lao postlka' chjwa'gake' ben' che'i yillwe' na' ben' yoo dii xiw'ka'. Na' yog' lolzgakile' chiyaki.

Wloogake' postlka' lillyana'

¹⁷ Na'ch bxoz choo bxoz xenna' na' saduceoka', ben'ka' nakgake'ne' txen, gokxee gokzbangakile' postlka'.

18 Na'ch bex'gake' postlka' na' wloogake' legake' lillyana'.

19 Na' wała' bllin to anjl che Xancho Chioza' bsalje' lillyana' na' bibeje' legake', na' golle':

20 —Li yiyaj yoodo'na', na' li wzajni ben'ka' chdop chllag na' doxen ka nak ye! mban zejli kani daa we' Chioza' legake'.

21 Na'ch ka wyeeni', biyajgake' yoodo'na' ka goll anjla' legake', na' bli' bsedgakile' ben'ka'.

Na'ch b̄xoz choo b̄xoz xenna' na' ben'ka' nakgake'ne' txen bitopgake' yog'lol ben'ka' chn̄abia' yell Israela', na' bsel'gake' ben' kwenche nan ll̄xi'gake' postlka' de lillyana'. 22 Na' ka bllin ben'ka' chap yoodo'na' cho'a lillyana', kochno postlka' de na'. 23 Na'ch jayellgake' ben'ka' chn̄abia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to ben' bi yoo lo'inna'.

24 Na' beena' ngoo lo nee ben'ka' chap yoodo'na', len b̄xozka' chn̄abia', ka bengakile' che'gake' ka', na' goggakile' gate yiyoll yido dga. 25 Na' ni choe'tegake' dill', bllin to ben' chi'e legake':

—Ben'ka' wloole lillyana' lle'tgake' yoodo'na' chli' chsedgakile' ben'ka' lle' na'.

26 Na'ch wyaj ben'ka' chap yoodo'na' kon beena' chn̄abia' legake' jaxi'gake' postlka' xochi. Bibi bengakile' legake' daa bllebgake' shi ben'ka' chzenag chegake' wliagake' legake' yaj. 27 Na' ka billinlengake' postlka' lao ben'ka' chn̄abia' yell Israela', na' b̄xoz choo b̄xoz xenna' chi'e legake':

28 —¿Abi chajle'kzlen nanto' le' bich wli' wsedzile ben' xtill' Jesúsza'? Na' li wwia ka ba benle, ba bli' bsedile yog' ben' Jerusalénki cho'a xtilleena', na' cheenile wtobile neto' daa betgake'ne'.

29 Na'ch Pédrona' len postlka' sto che'gake':

—Chonchan byen wzenagnto' che Chioza' aga ka che ben' yell-lioni. ³⁰ Le' betle Jesúza' na' bda'lene' lee yag cruza'. Na' Chios, beena' be'la'o dii xozxto'choka', le' bisbane'ne' ladj ben' wetka'. ³¹ Na' Chioza' ba mbeke'ne' kwite' de shlina' gana' ba chi'e chnabi'e, na' nzoe'ne' kwenche yisle' ben' lao dii mala', la' cheenile' yog' ben' Israelki yiyaj yileni dii malka' chongake' kwenche yizi'xen Chioza' chegake'. ³² Na' neto' choe'nto' dill' daa ble'into' gok che Jesúza', na' daa betj Espíritu Sántona', beena' ba bzoa Chioza' loo yichjlall'do' yog' ben' chzenague' che', lekzka' chli'n nakan ka nannto'.

³³ Na' ka beni ben' wñabia'ka' daa goll postlka', le bllaagake' na' goklall'gake' witgake' legake'. ³⁴ Na' ladj ben'ka' chñabia' len to fariseo, ben' le Gamaliel, ben' chli' chsedi leya', na' yog'z ben' chle'shi'gakile'ne'. Na' wzollee, golle' legake' kwejgake' postlka' xtit chyoolə, ³⁵ na' golle' ben' wñabia'ka':

—Le', ben' Israel, li wsak' shi bin gonile ben'ki. ³⁶ Li lljadini kani batz bchej to ben' le Teudas, na' wne' nake' to ben' zakii, na' ka do tap guioa ben' bengake'ne' txen. Na' ka betgake'ne', yog' ben'ka' gokgake'ne' txen biyeslesgake', bich bi bengake'. ³⁷ Na' ka wde gok ka', wizak dii yoblə kana' chlabgake' bal ben' lle' to to yell, na' bizchej Judas ben' Galileana', na' ka'kzə ben' zan bengake'ne' txen. Na' lekzka' betgake'ne' na' biyesles ben'ka' gokgake'ne' txen. ³⁸ Na' naa, nia' le' bibi gonile ben'ki, la' ka nak dga chli' chsedgakile', shi nakan dii chyiljlall'zgake' winitlokzan. ³⁹ Na' shi nakan che Chios, aga wak yisol yinitlen. Chiyal' wwiayen'le kwenche bi gakdil-lenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtill' Jesúza'.

Na' biyolla' bisangake' legake'. ⁴¹ Na'ch bichej postlka' gana' ndop nllag ben'ka' chnabia', na' le chibagakile' daa be' Chioza' latj bchi' bsak' ben'ka' legake' daa choe'gake' xtill' Jesúza'. ⁴² Na' yog' lla postlka' bli' bsdgakile' xtill' Jesucrístona' yoodo'na' na' lill ben'.

6

Wlejkake' gall ben' gak lall' nagake' mandadka'

¹ Na' ka zej chanch ben'ka' chonlilall' Jesúza', ben'ka' chne dill' griegona' wzolo che'gake' aga chaklebi ikaa noolə wizebka' chne dill' griegona' ka to daa chkaa nool wizebka' chne dill' hebrewa' kat' chyisgake' ye! wawa' yog' lla. ² Na'ch postlka' shllin bti'agake' yog' ben'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao ben'. ³ Na' le' ben' bish', li kwej gall ben' ladjleni, ben' chon wen, ben' chajni, na' chnabia' Espíritu Sántona' legake'. Na' gak lall' na'gake' chisgake' ye! wawa'. ⁴ Na' neto' we'l-lall'chnto' we'lwillnto' Chioza' na' wli' wsedchinto' ben' cho'a xtilleena'.

⁵ Na' yog'z ben'ka' biyoolall'gake' ka goll postlka', na' wlejkake' beena' le Esteban, nake' ben' nonlilall'chgue' Chioza' na' chnabia' Espíritu Sántona' le'. Na' lekzka' wlejkake' Felípena', Prócorona', Nicanora', Timónna', Parménaza', na' Nicoláza', ben' Antioquíana', beena' bene' txen ben' Israelka'. ⁶ Na' jwa'gake' legake' gana' lle' postlka', na' postlka' bxoə neeka' yichje'ka' na' wñabgakile' Chioza' gaklene' legake'.

⁷ Na' ben' zanch beni cho'a xtill' Chioza' na' wyanchga ben'ka' benlilall'gake' Jesúza' Jerusalénna', na' zan bxoza' bzenaggake' na' benlilall'gake' Jesúza'.

Bex'gake' Estébanna'

⁸ Na' Estébanna', wzoalenchga yel' wak che Chioza' le', na' dii xen goklene'ne' kwenche bli'e yel' wakka' na' bichlæ dii chonan ka yibani ben'. ⁹ Na'ch lle' shkwen ben' Israelka' ba biyell bila' lo na' ben'ka' wxi' legake', na' non chelægake' chdop chillaggake' gana' choe'lwillgake' Chioza'. Na' gokgake' toz bal ben' Cirene, ben' Alejandría, ben' Cilicia, na'ch ben' zaak do Ásiana', gokdil-lengake' Estébanna'. ¹⁰ Na' aga gokgake' yel' sin' che Estébanna', daa chnie' kon ka che' Espíritu che Chioza'ne'. ¹¹ Na' wdixjgake' bal ben' kwenche wxiye'gake', che'gake': “Ba beninto' Estébanna' chnie' zban che dii Moiséza' na' che Chioza'.” ¹² Na' daa gollgake' ka', bta bnegake' ben' zan, len ben' golka' chnabia' na' ben'ka' chli' chsedi leya' kwenche bex'gake' Estébanna' na' jwa'gake'ne' lao ben'ka' chnabia' ben' Israelka'. ¹³ Na' wdiljchgake' ben'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'. ¹⁴ Na' ba bizeninto' chizne' Jesús, ben' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

¹⁵ Na' yog' ben'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

7

Estébanna' bi'e dill' lao ben' wñabia'ka'

¹ Na'ch bxoꝝ choo bxoꝝ xenna' wñabile' Estébanna', chi'ene':

—¿Alekzi ben'ki ka chono'n?

² Na' Estébanna' chi'e legake':

—Le' ben' bish' na' le' nakle ka xanto', li wzenag dga inia' le': Chios chechona', beena' liizelozi nak ben' choo

ben' xen, bli'lawe' dii xoxzto'cho Abrahamama' kana' zoe' yell-liona' mbani Mesopotámiana', kana' zi' shaje' yell Haránna'. ³ Na' Chioza' golle'ne': “Bkwaan yell cho'ni na' dialla cho'ka', na' wyaj yell-lío gana' wliid' li'.” ⁴ Na'ch dii Abrahamama' bcheje' gana' mbani ben' caldeoka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho naa. ⁵ Na' Chioza' bi bene' lo na' dii Abrahamama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi' che dii Abrahamama' ba zoa ka golle'ne' ka'. ⁶ Na' lekzka' Chioza' chi'ene' xiin dia che'ka' soagake' yell zit' na' inabia' ben'ka' legake' wgongake' legake' llinna', na' wsak'zi'gake' legake' tap guioa yiz. ⁷ Na' lekzka' Chioza' golle'ne': “Gon' ye!' zi' che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'.” ⁸ Na' ka bcheb Chioza' gone' dii wen che dii Abrahamama', golle'ne' chiyal' sho'e senna' daa le circuncisión, le' na' xiin dia che'na'. Daan, dii Abrahamama' wlo'e dii xiine' Isaaca' senna' ka gok xon' lla goljb', na' ka'kzə ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shllin, ben'ka' gok dii xoxzto'cho, cho' ben' Israel.

⁹ Na' ben'ka' nak xiin dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', ¹⁰ na'ch bisle'ne' lao yog'lo' dii ben ble'ile'. Na' bi'ene' ye!' sin' kwenche faraónna', beena' chnabia' Egíptona', ble'shiile'ne' na' bzoe'ne' kwenche wnabia'lene' le' na' bene' lo nee yog' dii de che'.

¹¹ Na' wzolo wche' wbinna', na' gokchga ye!' zi' ye!' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xoxzto'choka'. ¹² Na' ka wnezi dii Jacoba' de trígona' Egíptona', na' bselee bi'

che'ka', ben'ka' gok dii xoxzto'cho, jxi'gake'n. ¹³ Na' ka wyajgake' de wchopi, dii Joséna' golle' legake' nan len' nake' ben' bish'gake', na'ch bembia' faraónna' dialla che dii Joséna'. ¹⁴ Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'. ¹⁵ Kan' gok jsoa dii Jacoba' Egíptona' gana' wite', na' lekzka' na' wit xiine'ka', ben'ka' gok dii xoxzto'cho. ¹⁶ Na' jakwash'gake' legake' loo bana' daa bizi' dii Abrahamama' yell Siquema' che xiin beena' le Hamor.

¹⁷ Na' ka ba zoa gao gon Chioza' daa bchebe' gone' che dii Abrahamama', ba wyanchga xiin dia che dii Israela', ben'ka' lle' Egíptona', ben' zan wal ba nakgake'. ¹⁸ Na'ch bllin lla wzolo wñabia' sto ben' yoblə yell Egíptona', ben' bi bembie dii Joséna'. ¹⁹ Na' ben' wñabia'na' wxiyee ben' wlall chechoka' na' biya dii bchi' bsakee dii xoxzto'choka', na' bene' byen lljchoongake' bdo'do' che'ka' kwenche guetgakb'. ²⁰ Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'. ²¹ Na' ka bich gok kwkash'gake'b' lille'ka', benan byen jchoongake'b' kwenche nan guetb'. Na'ch noola' nak xiin faraónna' billelile'b' na' bikeeb' na' bisgole'b' ka xiine'. ²² Ka' gok bsed dii Moiséza' yog'lol yel' sin' che ben' Egíptoka' na' bi'e dill' zakii na' leyi bene' dii zakii.

²³ Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wlall che'. ²⁴ Na' ka ble'ile' to ben' Egipto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. ²⁵ Na' goki dii Moiséza' ben' wlall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'. ²⁶ Na' betiyo ble'ile' chop ben' wlall che', ben' Israel, chdilgake'. Na' gokile' yizoe' legake' wen, na' chi'e legake': “¿Berache chdil-

lenzə ljwell-le?, aga ne' ben' bishee tił-lene'." 27 Na'ch beena' chit chyine' ben' wlall che'na' blligee dii Moiséza' na' chi'ene': "¿No bzoa li' inabi'o neto' na' koo xnezi chento'ni? 28 ¿Alezkka' cheenilo' wito' nad' ka beto' ben' Egíptona' daa neji?" 29 Na' daa goll beeni ka', dii Moiséza' bxonje' na' jsœ' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

30 'Ba gok choa yiz zoe' na', ka bli'lao to anjl le' to lo yag yesh' dii chal'nin, zoan gana' bibi chashj chleb gaoz Yaa Sinaína'. 31 Na' le bibani dii Moiséza' daa ble'ile' daa, na' wbiguee kwenche bwiayenee kwasloł. Na'ch benile' shii Xancho Chioza', chi'ene': 32 "Nadaan nak' Chios, beena' be'la'o dii xozxto'ka', Abrahamá', Isaaca' na' Jacoba'." Na'ch dii Moiséza' le bblebe' axt chxiztite', na' aga biyaxjchile' wwie'. 33 Na'ch Xancho Chioza' golle' dii Moiséza': "Blečj xelo'na', la' nad' zoa' latji gani zio', na' aga ka nla'z no se ni. 34 Nad' ba ble'id' yeł' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidołoo yiselaa Egíptona'."

35 'Na' Chioza' bseleene' kwenche yisle' ben' wlall che'ka' lo na' ben' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'nin. 36 Na' dii Moiséza' bene' zan yeł' wak diika' ben ka bibani ben' Egíptoka' kana' bibeje' dii xozxto'choka' lalle'ka'. Na' bene' yeł' wak loo nido'na' le Nido' Xna, na' lekzka' latja' gana' bibi chashj chleb gana' wdagake' choa yiz. 37 Na' golle' dii xozxto'choka': "Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'."

³⁸ Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.

³⁹ Na' dii xozxto'choka' aga goongakile' wzenaggake' che dii Moiséza', bzoatezgake'ne' ka'lə na' goklall'gake' yiyajgake' Egíptona'. ⁴⁰ Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." ⁴¹ Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'. ⁴² Na'ch Chioza' wlej yichje' legake' na' bi'e latj be'la'ogake' beljka' lliá xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan: Le', ben' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

⁴³ Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele, na' be'la'ole belj che chios chele Refánna', diika' benjilall'le.

Na' ni cheyi diikin kwej' le' lall-leni, na' wselaa le' zit' walch aga ka yell Babilóniana'.

⁴⁴ Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'. ⁴⁵ Dii xozxto'choka' bigaanlengake' yoodo' de lechaa, na' bia'gake'n ka wya-jlengake' dii Josuéna' jtíl-lengake' yellka' ben Chioza' lall' na'gake', na' bgaan lallchoni axt ka bllin lla wñabia' dii

Davina'. ⁴⁶ Na' Chioza', beena' be'la'o dii xoxxto'cho Jacoba', bibaile' ka ben dii Davina'. Na' Davina' wñabile'ne' wi'e latj gone' to lill xlatje'. ⁴⁷ Per Salomónna'lə, beena' nak xiine', bene'n ⁴⁸ la'kzi Chioza', beena' nak liizelozi ben' choo ben' xen, bi zoe' to loo yoo dii chon ben' yell-lioni. La' ka wna dii beena' wdixjee daa goll Chioza'ne' kani'yi:

⁴⁹ Yabana' nakan gana' chi'a chñabi'a,
na' lo yell-liona' nzoa' ñi'ani.

¿Nakran chakile gonle yoonā' gana' soa'?, na Xanchona'.

¿Achakile chyallj ga yizi'lallaa?

⁵⁰ ¿Abi chwiale nadaan ben' yog'lo! dii de?

⁵¹ 'Na'ch Estébanna' chi'e ben'ka' lle' na':

—Le ben' yichjlall'do' wal nakle. Bi chzenagle che Chioza' na' chonle ka ben' bi nombia' Chioza'. Nakle ben' widenag ka gok dii xoxxto'choka'. Bikzə chzenagle che Espíritu Sántona'. ⁵² Dii xoxxto'choka' bchi' bsak'gake' yog' dii ben'ka' wdixjee daa goll Chioza' legake' kani'yi. Betgake' ben'ka' be' dill' nan Chioza' wselee beena' zeelo nak ben' li ben' shao'. Na' ka bide' na' bénlene' lo na' ben'ka' betgake'ne'. ⁵³ La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴ Ka beni ben'ka' daa goll Estébanna' legake', le bllaagake' axt chaoyaaxaxj leye'ka'. ⁵⁵ Na' Estébanna', chñabia'chga Espíritu Sántona' le', na' blis lawe'na' yabana' ble'ile' yel' chey cheeni' che Chioza', na' ble'teile' ze Jesúza' kwit de shli che Chioza'. ⁵⁶ Na'ch golle' legake':

—Li wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shlina'.

⁵⁷ Na' ben'ka' lle' na' bsej nague'ka' kwenche bi bengakile' xtilleena', na' de chosyaadiazgake' bex'gake'ne'.

⁵⁸ Na' wlejjake'ne' yell Jerusalénna' jalliagake'ne' yaja'.

Na' beṅ'ka' ben ka' bkwaanlen xe'ka' daa ndobgake' to bi wew' le Saulo kwenche wdapbaan. ⁵⁹Na' ka chlliaḡake'ne' yaja', be'lwille' Jesúza', chi'ene':

—Jesús, li' nako' Xan', bizi' bikaagach nad'.

⁶⁰Na' biyoll wne' ka', na' bchek' xibe'na' na' wnie' zillj, wne':

—Xan', wxi'xen che beṅ'ki dga chongakile' nad'.

Na' biyoll wne' ka' wite'.

8

Sáulona' bchi' bsakee beṅ'ka' choe'la'o Jesúza'

¹Na' Sáulona' goke' toz beṅ'ka' betgake' Estébanna'.

Na' lo llana'tez wzolo bchi' bsak'gake' yog' beṅ'ka' nonlilall' Jesúza' Jerusalénna'. Na' wislesgake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'. ²Na' to chop beṅ' nonlilall' Jesúza' jakwash'gake' dii Estébanna' na' le wchellgakile'ne'. ³Na' Sáulona' bchi' bsakee beṅ'ka' nonlilall' Jesúza', chaje' lill che chegake' chjtoyoe' ka nool ka beṅ' byo kwenche chgwee legake' lillyana'.

Be'gake' dill' wen dill' kob che Crístona' gana' mbani Samáriana'

⁴Na' beṅ'ka' bllesh Jerusalénna' be'gake' dill' wen dill' kob che Crístona' gattezə wyajgake'. ⁵Na' beena' le Felipe, wyaje' to yell xen che Samáriana' na' be'lene' beṅ'ka' dill' che Crístona'. ⁶Na' bdop bllag beṅ', na' yog'lolgake' bzenagyen'gake' dill' daa be'Felípena', daa ble'gakile' yel' wakka' chone'. ⁷Na' beṅ' zan bichej dii xiwaa, na' ka bichejgakan chosyaadiagikan. Na' lekzka' biyone' zan beṅ' net ni'a nee, na' beṅ' bi chak sa' wen. ⁸Na' daa gok ka', le biba bizaki beṅ'ka' lle' yella'.

⁹Na' lekzka' yella' wzoa to beṅ' willa' lie' Simón, na' kon yel' willa'na' chone' chziyee beṅ' doxen gana' mbani

Samáriana', na' ben kwine' beṅ' choo beṅ' xen. ¹⁰ Yog' beṅ' lle' na' chzenaggake' xtilleena', ka bi' xkwid' ka beṅ' gol, na' nagake':

—Beenin nsi'gake' Yeḷ' Wak Choo Yeḷ' Wak Xen che Chios.

¹¹ Na' le wyajle'gake' che', la' zan yiz ba gok chziyee legake' kon yeḷ' willa'na' daa chone'. ¹² Na' ka bzajnií Felípena' legake' dill' wen dill' kob che yeḷ' wṇabia' che Chioza' na' che Jesucrístona', na' beṅ' zan wyajle'gake' xtilleena' na' wchoagake' nisa', ka noolə ka beṅ' byo. ¹³ Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yeḷ' wakka' daa chon Felípena'.

¹⁴ Na' ka wnezi postlka' lle' Jerusalénna' ba chajle' beṅ' Samáriaka' cho'a xtill' Chioza', na' bsel'gake' Pédrona' len Juanna' Samáriana'. ¹⁵ Na' ka bllingake', be'lwillgake' Chioza' wṇabgakile'ne' soa loo yichjlall'do' beṅ' Samáriaka' Espíritu Sántona'. ¹⁶ La' bin' soa' Espíritu Sántona' loo yichjlall'do'eka'. Tochga ba wchoagake' nisa' daa chajle'gake' che Xancho Jesúsza'. ¹⁷ Na'ch Pédrona' len Juanna' bṁoa neeka' yichj beṅ'ka', na' jsoa Espíritu Sántona' loo yichjlall'do'eka'.

¹⁸ Na' ka gokbe'i Simónna' jsoa Espíritu Sántona' loo yichjlall'do' beṅ'ka' biyoll bṁoa na' postlka' yichje'ka', na' bshabile' legake' mech, ¹⁹ chi'e:

—Li gon nad' yeḷ' waki kwenche nottez beṅ' ka wṁoa' na'ki yichje'ka' soa Espíritu Sántona' loo yichjlall'do'eka'.

²⁰ Na'ch Pédrona' golle'ne':

—Kwiayi'lenshgo' xmecho'na', daa chakilo' wak si'lENO'n daa chon Chioza' ka'z. ²¹ Bikz ga gak gono' ka nak dga chonnto', la' bi nak yichjlall'do'na' ka cheeni Chioza'. ²² Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'. ²³ La'

nakbia'cha bin nxe bin nzak' nak loo yichjlall'do'na', na' lennan' ntakw nchejan li'.

²⁴ Na'ch che' Simónna' legake':

—Li we'lwillgach Chioza' ni cha' kwenche bi gak daa ba wnale gak cha'.

²⁵ Na' ka biyoll be' Pédróna' na' Juanna' cho'a xstill' Chioza', na' biza'gake' ziyajgake' Jerusalénna'. Na' ka zingogake' nez, be'gake' dill' wen dill' kob che Jesucristóna' zan yellka' gana' mbani Samáriana'.

Felípena' na' ben' Etiopíana'

²⁶ Na'ch to anj̄ che Xancho Chioza' wnie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

²⁷ Na' wza' Felípena' zeje', na' tneza' billague' to ben' Etiopía wyaje' Jerusalénna' je'lawee Chioza'. Na' nake' to eunuco, * ben' zakii, na' nak lall' nee mech che noolə wnabia' che Etiopíana' beena' le Candace. ²⁸ Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi. ²⁹ Na'ch Espíritu che Chioza' chi'e Felípena':

—Jabig' kwit karreta'.

³⁰ Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

³¹ Na'ch ben' Etiopíana' chi'e:

—¿Nakra gon' shajniida'n?, la' bi zoa no wzajni nad'. Na' golle' Felípena':

* 8:27 Eunuco: zejin ben' wlejgake' xshitin wa ben' bibi nsee ka chaljtie'. Bwia glosáriona'.

—Wyepgach na' wche' kwitii.

³² Na' Cho'a Xtill' Chioza' gana' chlabe' nan:
Betgake'ne' ka chite' to xil'do';
na' ka to xil'do', ba bi chosyaa kat' chshibe'b,
ka'kz le', ni shcho'a dill' bi wnie'.

³³ Na' bsi'gake'ne' ye'l' zto', na' aga no goklen le' gone' ye'l'
joschis che'.

Na' kono xiin dia che wzoa,
la' bsol bnitgake' ye'l' mban che'na'.

³⁴ Na'ch ben' Etiopiana' chi'e Felipena':

—Ben goklen wna nad', ¿nora cheyin wna dii Isaíaza'
ka'? ¿Ache kwinen' cho'e dill', anti che ben' yoblan?

³⁵ Na'ch Felipena' wzoloe' bzajniile'ne' ka zeji gana'
chlabe' na' bi'e dill' wen dill' kob che Jesúza'. ³⁶ Na' ka
bllingake' to ga llia nis, na' che' ben' Etiopiana' Felipena':

—Ni llia nis, ¿ade daa wsej wllonan choa' nisa'?

³⁷ Na' che' Felipena'ne':

—Shi chajli'o do yichj do laloo, wak wchoa' li' nisa'.

Na' che' ben' Etiopiana':

—Chajli'a Jesucristona' nake' Xiin Chioza'.

³⁸ Na'ch bkweze' karreta' na' betjgake'; na' wyoogake'
loo nisa' na' Felipena' bchoe'ne' nisa'. ³⁹ Na' ka bichej-
gake' loo nisa', Espiritu che Xancho Chioza' bichi'e
Felipena' gan yoblə, na' aga ble'chi ben' Etiopiana' le', per
chiba chizakile' ziyaje'. ⁴⁰ Na' Felipena' billine' yella' le
Azoto, na' bidie' to to yell chyise' dill' wen dill' kob che
Jesúza' axt billintie' Cesareana'.

9

Bisha' Chioza' yichjlall'do' Sáulona'

(Hch. 22:6-16; 26:12-18)

¹ Na' Sáulona' kon chde' chwall chshebe' ben'ka'
nonlilall' Xancho Jesucristona'. Chiyiljallee nak gone'

kwenche wite' legake'. Daan wyaje' Jerusalénna' jawie' b̄xoz choo b̄xoz xenna' ² na' w̄nabile'ne' wzeje' twej yish che to to gana' chdop chllag ben' wlall che'ka' choe'lwillgake' Chioza' yell Damáscona', na' we'n lsens yiyilje' ben'ka' ba wyoo lo nez li nez shao' che Jesu-crístona' na' goxee legake' kwenche yichi'e legake' pres Jerusalénna', ka noolə ka ben' byo. ³ Ka ni ngwee nez, na' ba zoa illine' yell Damáscona', tokonganzi wyechj to beeni' xen wal le' dii za' yabalə. ⁴ Na' Sáulona' jchaze' lo yona' na' benile' to shii ben', chi'ene':

—Saulo, Saulo, ¿biche chchi' chsak'zo' nad'?

⁵ Na'ch Sáulona' chi'e:

—¿Nora li', ben'?

Na'ch billii beenan', chi'e:

—Nadaan Jesúza', beena' chchi' chsakoo. Na' daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b.

⁶ Na'ch Sáulona' axt chxiztite' daa chllebe', na' golle'ne':

—Xan', ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiyal' gono'.

⁷ Na' ben'ka' zejlengake' Sáulona' txen legatega wze-gake' bibangakile' na' bllébgake', daa bengakile' chak x̄ne, per ni to kono ble'gakile'. ⁸ Na'ch biyas Sáulona' lo yona'. Na' ka b̄xa' jalawe'na' aga ble'chile'. Na' ben'ka' zejlene' txen bex'gake' neena' kwenche bche'gake'ne' yell Damáscona'. ⁹ Na' shon̄ lla bi gok ile'ile', ni bi weej wdawe'.

¹⁰ Na' Damáscona' zoa to ben' chon̄lilallee Jesúza' na' lie' Ananías, na' ben Xancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

¹¹ Na' Xanchona' chi'ene':

—Wyaj, na' wyoo neza' daa le Shlichá, na' lill Júdaza' inabo' to ben' Tarso, ben' le Saulo. Ba choe'lwille' nad',
¹² na' ba ble'do'ile' li' choo gana' zoe' na' chxoá noona'ne' kwenche yile'ile'.

¹³ Ka beni Ananíaza' chi'ene' ka', na' golle'ne':

—Xan', ze xtill' beena' chsak'zi'e ben'ka' nonlilall' li' Jerusalénna'. ¹⁴ Na' naa ba blee ni noxee yish daa bzej bxoza' chnabia' daa cho'en lsens goxee yog'lolnto', neto' choe'lwillnto' li', na' yichi'e neto' pres Jerusalénna'.

¹⁵ Na' Xancho Jesúsza' golle'ne':

—Wyaj, la' ba wlej' Sáulona' kwenche wi'e xtillaana' lao ben'ka' bi nak ben' Israel, na' lao ben' wnabia' che'ka', na' lekzka' laole le' nakle ben' Israel. ¹⁶ Nad' wliidee ka chiyal' si' sakee ni cha'.

¹⁷ Na'ch Ananíaza' wyaje' gana' zoa Sáulona' na' wyo'e loo yooná, na' bxoá neena'ne'. Na' chi'ene':

—Saulo, ben' bish', Xancho Jesúsza', beena' wnie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjlall'do'na'.

¹⁸ Na' ka bxoá neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'. ¹⁹ Na' ka wdawe', biyakshao'lallee, na' bigaanlene' ben'ka' nonlilall' Jesúsza' yell Damáscona' zan lla.

Be' Sáulona' xtill' Chioza' yell Damáscona'

²⁰ Na' lii wzolote Sáulona' cho'e xtill' Crístona' to to gana' chdop chllag ben' Israelka' choe'lwillgake' Chioza' yell Damáscona', na' chi'e ben'ka' Jesúsza' nake' Xiin Chioza'. ²¹ Na' yog' ben'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúza' Jerusalénna'? Na' ¿aaga ni cheyinnan' bide' ni kwenche yichi'e yog'lolgake' pres ljasane' legake' lao bxozka' chnabia'?

²² Na' btipch lall' Sáulona' kwenche zizikchli bi'e dill' nan Jesúzan' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sáulona' lo na' ben' Israelka'

²³ Ka ba gok zan lla choe' Sáulona' xtill' Jesúza' yell Damáscona', na' ben' Israelka' lle' na' bshag ljwllgake' nan witgake'ne'. ²⁴ Na' gokbe'i Sáulona' ba chinogake'ne'. Ka wal ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'. ²⁵ Na' ch ben'ka' nonlene' txen, wal-lə wloogake'ne' to loo lllom na' biletjgake'ne' lee zeena' nechj yella' kwenche bile'.

Billin Sáulona' Jerusalénna'

²⁶ Ka billin Sáulona' Jerusalénna', gokile' lene' ben'ka' nonlilall' Jesúza', per yog'lolle' bblebgake'ne', bi wyajle'gake' shi dii li ba chonlilallee Jesúza'. ²⁷ Na' Bernabéna' bchi'e Sáulona' gana' lle' postlka'. Na' golle' legake' nan Sáulona' ble'ile' Xancho Jesúza' tneza' ka zeje' yell Damáscona', na' Jesúza' be'lene'ne' dill'. Na' lekzka' golle' legake' bi bblebe' bi'e xtill' Jesúza' yell Damáscona'. ²⁸ Na' ka' gok bigaane' Jerusalénna' goke' txen ben'ka' nonlilall' Jesúza', na' wal inlleb goke' bi'e xtill' Xancho Jesúza'. ²⁹ Na' be'lene' dill' ben' Israelka' chne dill' griegona' kwenche shajle'gake' che Jesúza', per legake' goklall'ligake' witgake'ne'. ³⁰ Na' ka wnezi ben'ka' nonlilall' Jesúza' ba chinogake' Sáulona' kwenche witgake'ne', bche'gake'ne' Cesareana'lə. Na' ka bllingake' na', na' bisele'gake'ne' Társona'lə gana' nak lalle'.

³¹ Na'ch ben'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

³² Do kana', chda Pédrona' chjawie' ben'ka' nonlilall' Jesúza' to to yell, na' lekzka' jawie' ben'ka' lle' yell Lídana'.

³³ Na' yell Lídana' jti'e to ben' le' Eneas. Ba gok xon' yiz die' bi chak chase' daa net ni'a neena'. ³⁴ Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. ³⁵ Na' yog' ben'ka' lle' yell Lídana' na' yell Sarónna', ble'gakile' biyaki beena' na' benlilall'gake' Xancho Jesúza'.

Biban Dorcaza' ladj ben' wetka'

³⁶ Na' lekzka' yell Jópena' wzoa to noolə benlilallee Jesúza', na' wlie' Tabita,* na' dill' griegona' che'gake'ne' Dorcas. Na' nooli, shlak wbane' toshiizi bzani ni'a neena' goklene' ben', na' biyesh'lallile' ben'ka' bibi de cheyin.

³⁷ Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliia shkwiana' cha'lə. ³⁸ Na' Jópena' llian gaozə yell Lídana', na' ben'ka' wnezgakile' zoa Pédrona' yell Lídana', na'ch bsel'gake' chop ben' jellgake'ne':

—Sho'gach Jópena' naate.

³⁹ Na'ch Pédrona' wzee zejlene' ben'ka' Jópena'. Na' ka blline', na' jwa'gake'ne' loo yona' gana' de ben' weta', na' yog' nool wizebka' wyechjgake' Pédrona' chbellgake', na' bli'gakile'ne' xe'ka' daa ben dii Dorcaza' shlak wbane'.

* 9:36 Tabita: dillii nakan dill' arameo.

⁴⁰ Na' Pédróna' bibeje' yog'lóle' chyoolə, na' b̄chek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bixa'te jalao Dorcaza' chwie' Pédróna'. Na'ch biyase' bibi'e. ⁴¹ Na' Pédróna' beḡee neena' na' bisolléene'. Na'ch binie' nool wizebka' na' nochlə beḡ'ka' nonlilall' Jesúza' kwenche bizoe'ne' shi'a shbane' lawe'ka'. ⁴² Na' wze dill' doxen yell Jópena' ka gok che Dorcaza', na' beḡ' zan benlilall'gake' Xancho Jesúza'. ⁴³ Na' Pédróna' bigaane' Jópena' zan lla lill Simónna, beena' chkoll yidxa bayix'ka'.

10

Pédróna' na' Cornéliona'

¹ Na' yell Cesareana' wzoa to beḡ' wlie' Cornelio, na' nak lall' nee zan soldadka', na' beḡ'ka' nak lall' nee wlegake' Ben' Italia. ² Na' Cornéliona' len beḡ'ka' nakgake' toz loo yoo lille'na' choe'la'ogake' Chioza' na' chall chlleb-gake'ne'. Na' zoatezi zoe' choe'lwille' Chioza' na' cho'e mech xen kwenche chaklene' beḡ' Israelka', beḡ'ka' chyallj ch̄chinin. ³ To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴ Na' Cornéliona' chwiayenee anjla' do chllebze', na' golle'ne':

—¿Beran cheenilo' beḡ'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' beḡ' yesh'ka'. ⁵ Na' naa bsel' beḡ' shajgake' yell Jópena' kwenche lljxi'gake' beena' le Simón Pedro. ⁶ Zoe' lill to beḡ' le Simón, beena' chkoll yid, na' lille'na'

zoan gaoz cho'a niso'da'. Na' Simón Pédróna' ine' li' daa chiyal' gono'.

⁷ Na' ka biza' anjla' bshaljlen Cornéliona', na'ch Cornéliona' goxe' chop xmoste'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez. ⁸ Na' golle' legake' yog' daa goll anjla', na'ch bselee legake' Jópéna'.

⁹ Na' betiyo do ka gobill ba zoa illin ben'ka' bsel' Cornéliona' yell Jópéna'. Na' ka lo gora', Pédróna' wyepe' koll' yoona' gana' zoe' kwenche we'lwille' Chioza'. ¹⁰ Na' wdona', na' goklallee gawe' shel'ka'. Na' shlak chongake' daa gawe', ble'do'ile' ¹¹ byalj yabana', na' to dii nak ka to lech' xen dii nchej tap yichjten chetjan lo yona'. ¹² Na' loo lechaa lle' biya bayix', no ba llia tap ni'a na'in, na' no ba chxobi leeb lo yona' na' no ba zoa xilin. ¹³ Na'ch benile' shii to ben', chi'ene':

—Wzolla' Pedro. Bet baka', na' wdao.

¹⁴ Na'ch Pédróna' golle'ne':

—Bi gaw' baka', Xan'; ni shlin bin' gaw' baki bi nak ba xilall'.

¹⁵ Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

¹⁶ Shon shii golle' ka', na'ch biyep lechaa yabana'. ¹⁷ Na' chibani Pédróna' chakile' bera zejín daa ble'do'ile', ka bllin ben'ka' bsel' Cornéliona' cho'a yoona' gana' zoe', daa ba wñabgake' gan zoa lill beena' le' Simón, beena' chkoll' yid xa bayix'ka'. ¹⁸ Na' ka bllingake', na' wñegake' zillj wñabgake' shi nan' zoa to ben' le Simón Pedro. ¹⁹ Na' Pédróna' zie' wñeyi cheyi daa ble'do'ile', kat' wne Espíritu Sántona', chi'ene':

—Bwiakachi, na' lle' shon ben' chiyiljgake' li'.

²⁰ Bizolla' na' biyetj, na' wyajlengake'. Bi gakchopilo', la' nadaan bsela' legake'.

²¹ Na'ch biyetj Pédrona' gana' lle' beṅ'ka' bseḷ' Cornéliona'. Na' chi'e ḷegake':

—Nadaan beena' chiyiljle. ¿Beran chak chele zidwiale nad'?

²² Na'ch che' beṅ'ka' Pédrona':

—To beṅ' wṅabia' che soldadka' lie' Cornelio bseḷee neto'. Nake' to beṅ' zej shḷi lao Chioza' na' ngooshosh yichje'ne', na' yog' beṅ' Israelka' neḷgakile' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajniilo'ne' na' wzenague' dill'ka' we'leno'ne'.

²³ Na'ch Pédrona' wlo'e ḷegake' ḷoo yoolā gana' zoe', na' bigaangake' shyel. Na' betiyo wyajlen Pédrona' ḷegake' na' len to chop beṅ' Jope, beṅ' nonḷilall' Jesúza'.

²⁴ Na' llana' sto bllingake' Cesareana'. Na' Cornéliona' ba btope' yog'ḷoḷ dialla che'na' na' beṅ'ka' nllaguile', na' ba lle'gake' lille'na' chbezgake' illin Pédrona'. ²⁵ Na' ka bllin Pédrona' lill Cornéliona', lii bchejte Cornéliona' bchek' xibe'na' lawe'na' choe'laweene'. ²⁶ Na' Pédrona' bisolléene', chi'ene':

—Bizolla', bi wchekz' xibo' lawii, ḷa' ḷekzka' beṅ'zə nad'.

²⁷ Na'ch shlak chshaljgake' wyoogake' ḷoo yoonā, na' ble'i Pédrona' beṅ' zan ba lle'. ²⁸ Na'ch golle' ḷegake':

—Le' neḷzile ka na ley chento'na', neto' beṅ' Israel bi chiyal' gonnto' txen le' bi nakle beṅ' Israel, na' ni bi chiyal' sho'nto' ḷoo yoo lill-le. Per Chioza' ba bzajniile' nad' bi chiyal' gakid' zban nottez beṅ'. ²⁹ Daan ka bla' beṅ'ki chnegake' nad', lii za'tia' bi bchia' dill'. Na' naa cheenid' inezid' bi che bseḷoo beṅ'ki bidxi'gake' nad'.

³⁰ Na'ch Cornéliona' chi'ene':

—Ba gok tap lla, do ka naayen', chida shon, choe'ḷwill' Chioza' ḷoo lillii kat' ble'id' to beṅ' byo zie' lawa' nakwe' to lech' dii chey cheeni'. ³¹ Na' wne' nad': “Cornelio, Chioza' ba bzenague' daa choe'ḷwillo'ne', na' ḷekzka' chle'ile' ka

chakleno' ben' yesh'ka'. ³² Na' bsel' ben' shajgake' yell Jópena' lljxi'gake' Simón Pédrone' kwenche yide' we'lene' li' dill'. Zoe' lill to ben' le Simón, ben' chkoll yid, na' lill beeni zoan gaoz cho'a nisdona'." ³³ Daan lii bentia' wneyi bidxi'gake' li', na' choxkeno' ba bido'. Na' nezki Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédrone' dill' lill Cornélione'

³⁴ Na'ch wzolo Pédrone' bi'e dill', chi'e:

—Chakbe'id' naa, dii li Chioza' aga nakzi ben' chakile', ³⁵ san chle'shiile' yog' ben' lle' gattez yell kon shi chall chllbgake'ne' na' chongake' daa nak shli. ³⁶ Chioza' bselee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bselee Jesucristona', beena' nak Xan yog'lolcho. ³⁷ Nezkzile kwaslol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis. ³⁸ Nezile Chioza' bi'e Jesús, ben' Nazareta', yel' wak na' Espiritu Sántona', na' wda Jesúza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'. ³⁹ Neto' choe'nto' dill' che yog'te diika' ben Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'. ⁴⁰ Per Chioza' bisbane'ne' ladj ben' wetka' biyoll llana', na' bidli'lawe' neto'. ⁴¹ Aga yog' ben' bli'lao Jesúza' ka bibane' ladj ben' wetka', san bli'lawe' toz neto', neto' naknto' ben' ba wlej Chioza' kwenche we'nto' xtilleena'. Na' neto' weej wdaolennonto'ne' ka wde bibane' ladj ben' wetka'. ⁴² Na' Jesúza' bselee neto' chixje'into' ben' nan Chioza' nzoe'ne' kwenche gone' yel' joschis che yog'lol ben', ka ben' mban na' ka ben' ba wit. ⁴³ Na' lekzka' kani'yi yog' dii ben'ka' wdixjee daa goll Chioza' legake' be'gake' xtill'

Jesúza', w_nagake' Chioza' yizi'xene' saaxya che nottezə ben' gonlilallee Jesúza'.

Wyoo Espíritu Sántona' loo yichjlall'do' ben'ka' bi nak ben' Israel

⁴⁴ Na' ni chshaljte Pédrona', kat' Espíritu Sántona' wyo'e loo yichjlall'do' yog' ben'ka' chzenaggake' xtilleena'. ⁴⁵ Na' ben' Israelka' nonlilall' Jesúza', ben'ka' bllinlen Pédrona' lill Cornéliona', bibangakile' daa wyoo Espíritu Sántona' loo yichjlall'do' ben'ka' bi nak ben' Israel. ⁴⁶ Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'. ⁴⁷ Na' Pédrona' golle' ben' Israelka' lle' na':

—Aga no gak wllon wchoa ben'ki nisa', la' ba yoo Espíritu Sántona' loo yichjlall'do'eka' ka ba yo'e cho'.

⁴⁸ Na' ben Pédrona' mandad wchoagake' nisa' daa chonlilall'gake' Xancho Jesucrístona'. Na' biyolla' w_nabgakile' Pédrona' kwenche bigaanlene' legake' chop shonlla.

11

Pédrona' golle' ben' Jerusalénka' ka gok

¹ Na' postlka' na' nochlə ben'ka' nonlilall' Jesúza' Judeana' bengakile' nan ben'ka' bi nak ben' Israel lekzka' chajle'gake' cho'a xtill' Chioza'. ² Na' ka billin Pédrona' Jerusalénna' gokdił-len xonj ben' le', ben'ka' che' chonan byen sho' ben' byoka' nonlilall' Chioza' sen daa le circuncisión la'kzi bi nakgake' ben' Israel. ³ Na' gollgake'ne':

—¿Biche wyoozo' loo yoo lill ben'ka' bi nak ben' Israel na' weej wdaolenzgako'ne'?

⁴ Na'ch Pédrona' golle' legake' yog' ka gok, chi'e:

⁵ —Kana' ni zoa yell Jópena', shlak choe'lwíll' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. ⁶ Na' ka

bwiayēnaa diika' llia loo lechaa, na' ble'id' lle' bayix' ba zoa tap ni'a na'b, na' no ba znia, no ba chxobi le'in lo yona', na' ba zoa xilin. ⁷ Na' benid' shii to ben' ne' nad': "Wzolla' Pedro, bet baka' na' wdao." ⁸ Na' goshee: "Bi, Xan', ni tshii bin' gaw' baki bi nak ba xilall'." ⁹ Na' sto shii benid' shii beena' ne' nad': "Daa ba wna Chioza' wak gawo' bich inazo' bi nakan xilall'." ¹⁰ Gokte shon shii wne ka', na'tech biyep lech' xenna' yabana'. ¹¹ Na' shintg ble'do'id' diika' kat' bidse shonə ben' cho'a yoonā' gana' zoa', zaake' yell Cesareana' ziddiljgake' nad'. ¹² Na' Espiritu che Chioza' wne' nad' bi gonchoplallaa sha'len' legake'. Na' lenkz ben' bish'choki xop wza'lengake' nad', na' yog'tento' wyoonto' lill Cornéliona'. ¹³ Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': "Bsel' to chop ben' yell Jópēna' kwenche lljxi'gake' beena' le Simón Pedro. ¹⁴ Na' le' ine' li' nakan gono' kwenche yilaleno' ben'ka' lle' loo yoo lillo'na' bi kwiayi'le." ¹⁵ Na' ka wzoloa' choe'lengakee dill', betj Espiritu Sántona' wyo'e loo yichjlall'do'eka', ka bidsoe' loo yichjlall'do'choki. ¹⁶ Na' ch jadinid' daa wna Xancho Jesúsza' kana' wne': "Dii li Juanna' bchoe' ben' nis, san le', dii zak'chi gak chele, daa yidsoa Espiritu Sántona' loo yichjlall'do'lēna'." ¹⁷ La' Chioza' bene' ka zoa Espiritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucristona'. Na' jnora nak' nad' wllon' gon Chioza' daa cheenile' gone'?

¹⁸ Na' ch ka biyoll bzenag ben' Jerusalénka' nonlilall' Jesúsza' dillaa be' Pédrōna', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len ben'ka' bi nak ben' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kani.

Ben'ka' nonlilall' Jesúsza' Antioquíana'

¹⁹ Na' beṅ' Israelka' nonlilall' Jesúza', beṅ'ka' bsheshlesgake' ka wde wit dii Estébanna', bale' wyaj zit' axt Feníciana', na' zi bale' bllin Chíprena' na' zibale' bllin yell Antioquíana'. Na' gana' bllin to toe' be'lengake' to beṅ' wlall' che'ka'z xtill' Jesúza'. ²⁰ Per baḷ beṅ'ka' nak beṅ' Chipre na' beṅ' Cirene, ka bllingake' yell Antioquíana', wzologake' be'lengake' beṅ' bi nak beṅ' Israel dill' wen dill' kob che Xancho Jesúza'. ²¹ Na' yeḷ' wak che Xanchona' wzoalenan legake', na' beṅ' zan wlej yichjgake' diika' nxenilall'gake' na' beṅlilall'gake' Xancho Jesúza'.

²² Na' beṅ'ka' nonlilall' Jesúza' Jerusalénna', ka wnezgakile' ba nonlilall' beṅ' Antioquíaka' Jesúza', na' bsel'gake' Bernabéna' jawie' legake'. ²³ Na' ka blline' Antioquíana', ble'ile' ba goklenchga Chioza' legake' na' le bibaile'. Na' btipche' lall' beṅ'ka' kwenche soacheḡgake' gonlilall'gake' Xancho Jesúza' do yichj do lall'gake'. ²⁴ Na' beṅ' zanch beṅlilall'gake' Xancho Jesúza', la' Bernabéna' nake' to beṅ' wen, na' chṅabia' Espíritu Sántona' le', na' le beṅlilallee Chioza'.

²⁵ Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'. ²⁶ Na' wzoalengake' beṅ'ka' nonlilall' Jesúza' Antioquíana' twiz, na' bli' bsedgakile' beṅ' zan. Na' Antioquíana' dii nechdo' bsi'gake' beṅ'ka' nonlilall' Jesucrístona' "Cristianos".

²⁷ Na' do kana'kzə, baḷ beṅ'ka' chyixjee daa che' Chioza' legake' wza'gake' Jerusalénna' bllingake' Antioquíana'. ²⁸ Na' wzolla' toe', beena' le Ágabo, na' bi'e dill' ka ba bzajnii Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chṅabia' beena' le Claudio gana' mbani Rómana'. ²⁹ Na' beṅ' Antioquíaka' nonlilall' Jesúza' be'gake' dill' we'gake' kon ka'k' wej gag we' to toe' kwenche gaklengake' beṅ'ka' nonlilall'

Jesúza' gana' mbani Judeana', gana' chi' wbinna'. ³⁰ Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao ben'ka' ngoo lall' na' ben'ka' nonlilall' Jesúza' Judeana'.

12

Betgake' Jacóbona' na' wloogake' Pédrona' lillyana'

¹ Na' do kana'kzə ben' wñabia' Heródeza' bexee bal ben'ka' nonlilall' Jesúza' kwenche wchi' wsakee legake'. ² Na' bchogloe' gueti Jacóbona' yesya, beena' nak ben' bish' Juanna'. ³ Na' ka gokbe'ile' bibayi ben'ka' chñabia' ben' Israelka' daa bene'ka', na' ch lekzka' bexee Pédrona' lo lni Paskwa' kana' chaogake' yetxtila' daa bi nchix levadúrana'. ⁴ Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibeji ljwellgake' wdapgake'ne'. Na' gokile' yiyoll lni Paskwa' kweje'ne' lao ben' yellka' na' wchogloe' che' guete'. ⁵ Shlak nej Pédrona' lillyana', ben'ka' nonlilall' Jesúza' toshiizi be'lwillgake' Chioza' ni che'.

Chioza' bibeje' Pédrona' lillyana'

⁶ Na' lle'na' ka wxezə kwej Heródeza'ne' kwenche wchogloe' che' guete', Pédrona' die' chese' ladj chop soldadka', na' nchejgake'ne' chop gden, na' zi chop soldadka' chapgake' cho'a lillyana'. ⁷ Na' tokonganzi bllin to anjl che Xancho Chioza' gana' de Pédrona' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. ⁸ Na'ch che' anjla'ne':

—Bikaacha li'ona' na' bilej xelo'na'.

Na' ben Pédrona' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

⁹ Na'ch zjano Pédróna' anjla', ni bi nezile' shi ka chakkzan, kon gokile' chle'do'zilen'. ¹⁰ Na' bidegake' gana' lle' soldadka' shkwen, na' bidetegake' gana' lle' ben'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédróna'. ¹¹ Kana'ch gokbe'i Pédróna', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non ben' Israelki lez gak cha'.

¹² Na' ka gokbe'ile' ba bicheje' lillyana', na' ziyaje' lill Maríana' xna' Juanna', beena' nsi'gake' Marcos. Na' lill Maríana' ndop nllag ben' zan choe'llwillgake' Chioza'. ¹³ Ka blline', na' wnie' cho'a leeja', na' bchej to bi' noola le Rode, jawiab' no beena' chne. ¹⁴ Na' ka biyombia'b' shii Pédróna' chibachgaib', na' daa le chibaib' bikz bsalj'b'. Zigaate jayellb' ben'ka' lle' loo yooná' ba ze Pédróna' cho'a leeja'. ¹⁵ Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'na'ljan.

¹⁶ Na' Pédróna' ni zie' chnie' cho'a leeja'. Na' ka bsaljgake' ble'gakile'ne', bibanchgagakile'. ¹⁷ Na'ch Pédróna' bene' to sen kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' ben' bish'choka' ka ba ben Xanchona' cha'.

Na'ch bizee ziyaje' gan yoblə.

¹⁸ Na' ka wyeeni', wche' to ye'l' wban xen ladj soldadka' daa bi gokbe'gakile' nak gok bichej Pédróna'. ¹⁹ Na'ch Heródeza' bta bníe' ben'ka' biyiljgake'ne', na' bi billelgakile'ne'. Na'ch wnable' soldadka' chap lillyana' nak gok

bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

Ka wit Heródeza'

²⁰ Heródeza' chllée ben' Tíroka' na' ben' Sidónka'. Na' ben'ki gokgake' toz bshaljlengake' Blástona', to wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gogake' gana' chnabia' Heródeza'. Na' Blástona' bshaljlene' Heródeza' kwenche wxi'xene' che ben' Tíroka' na' ben' Sidónka' na' yizoalene' legake' wen sto shii. ²¹ Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' ben'. Na'ch jshie' gana' chchogloe' che ben', na' bi'e dill' lao ben'ka' ndop nllag na'. ²² Na' shlak cho'e dill', na' besyaa ben'ka' che'gake':

—To chioza'n chne, aga kontele benaan.

²³ Na' anjl che Xancho Chioza' lii be'tie' Heródeza' to yillwe' wal benan ka chyin chlall' bel bzog'ka' loo li'ena' na' wite', daa bi'e latj wloo ben'ka' le' balaan daa chidol' toz beena' nak dowalj Chios.

²⁴ Na' dill' wen che Chioza' zej chlliljchan doxen.

²⁵ Na' Bernabéna' len Sáulona' ka wde bengake' daa chiyal' gongake' Jerusalénna', biza'gake' biyajgake' Antioquíana', na' bche'gake' Juanna', beena' lekzka' nsi'gake' Marcos.

13

Bernabéna' na' Sáulona' je'gake' cho'a xtill' Chioza' yell zit'ka'

¹ Na' ladj ben'ka' nonlilall' Jesúza' yell Antioquíana' lengake' ben' chyixjee daa che' Chioza' na' ben' chli' chsedi cho'a xtill' Chioza'. Na' legake' ben'ki: Bernabéna',

Simónna', beena' che'gake' ben' gasj, Lúciona' ben' Ciré-nena', Sáulona' na' Manaénna', beena' bgol-len Heródeza' beena' wñabia' gana' mbani Galileana'. ² Na' to shii ka zoagake' wbasaa na' choe'la'ogake' Chioza' wñe Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

³ Na' ka wyeelo be'lwilgake' Chioza' na' biyoll wzoagake' wbasaa, na' bxoaa neeka' yichj ben'ka' chop, na'ch bsel'gake' legake' gana' ljengake' xshin Chioza'.

Páblona' na' Bernabéna' be'gake' cho'a xtill' Chioza' gana' le Chipre

⁴ Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lío Chíprena' daa llia lo nisdona'. ⁵ Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtill' Chioza' to to gana' chdop chllag ben' Israelka' choe'lwilgake' Chioza'. Na' nche'gake' sto ben' le Juan kwenche gaklene' legake'. ⁶ Na' wdegake' to to yellka' llia Chíprena'. Na' ka bllingake' yell Páfoza', na' jadi'gake' to ben' Israel, beena' le Barjesús. Nake' to ben' willa', na' chziyee ben' chi'e nake' to ben' chyixjee daa che' Chioza' le'. ⁷ Na' beeni nlaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to ben' chajni, na' goxe' Bernabéna' len Sáulona' kwenche wzajni'gakile'ne' cho'a xtill' Chioza'. ⁸ Na' ben' willa'na', nsi'gake'ne' Elimas (na' zejin ben' willa'), goklallee gone' ka bi shajle' ben' wñabia'na' che cho'a xtill' Chioza'. ⁹ Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiaýenee Elímaza', ¹⁰ na' golle'ne':

—Li' ben' wxiye', beṇ' wen dii mal, xiin dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'? ¹¹ Na' naa Chioza' wselee yeḷ' zi' cho', gone' ka ichoḷo' na' shloll wen bich ile'ilo' beeni' che wbillā'.

Na' kate golle'ne' ka' lii wchoḷtie', na' chgan chtobzile' chṇabe' no yiyoḅ' neena' daa bich chle'ile'. ¹² Na' ka ble'i beṇ' wṇabia'na' daa gok, na' wyajli'e, na' le bibanile' ka nak cho'a xtill' Xancho Jesúsza' daa chli' chsedgakile'ne'.

Páblona' na' Bernabéna' wyajgake' yell Antioquíana' daa lliá gana' mbani Pisídiana'

¹³ Na'ch Páblona' na' beṇ'ka' chdalene' wyoogake' barkwa' yell Páfoza' na' wyajgake' yell Pérgena' daa lliá gana' mbani Panfílina', na' Juan Márcona' bixonje' ziyaje' Jerusalénna'. ¹⁴ Na' Páblona' len beṇ'ka' chdalene' na', biza'gake' yell Pérgena' na' wyajgake' yell Antioquíana' daa lliá gana' mbani Pisídiana'. Na' ka bllin lla sabda', llana' chombaān beṇ' Israelka', wyajgake' gana' chdop chllaggake' choe'ḷwillgake' Chioza', na' jche'lengake' beṇ'ka'. ¹⁵ Na' ka biyoll blabgake' lat' ley che Chioza' na' zi lat' daa bzej dii beṇ'ka' wdixjee daa goll Chioza' ḷegake', na'ch beṇ'ka' chgoo xnezi cheyi diika' chongake' gana' chdop chllaggake' bsel'gake' to beṇ' gana' chi' Páblona' len Bernabéna' na' golle' ḷegake':

—Le' beṇ' bish', shi bi dill' de we'lenle beṇ'ki kwenche wtipch lall'gake', wak we'len naa.

¹⁶ Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', beṇ' Israel, na' le' bi nakle beṇ' Israel choe'la'ole Chioza', li wzenag dga inia': ¹⁷ Chios, beena' nonḷilall'cho cho' beṇ' Israel, wleje' dii xozxto'choka' na' bene' ka wyangake' shlak wzoagake' Egíptona'. Na' bllin lla bibeje' ḷegake' kon yeḷ' wak che'na'. ¹⁸ Na' wdape' yeḷ' chxenlall'

che yel' widenag che'ka' lo choa yiza' wzoagake' latja' gana' bibi chashj chleb. ¹⁹ Na' blliyee yellka' gall kwen lle' gana' mbani Canaánna' kwenche bi'e dii xozxto'choka' yell-lío che'ka'. ²⁰ Kan' gok lawi tap guiyoa yoo gashj yiz. Na'tech, bzoa' Chioza' ben'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'. ²¹ Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'. ²² Na' ka bikwas Chioza' yel' wñabia' che dii Saúla', bizoe' dii Davina' inabi'e na' bi'e dill' che', wne': "Davina', xiin Isaína', nake' to ben' chon ka chazlallaa, na' nezid' gone' yog' daa cheenid' gone'." ²³ Na' lo dia che dii Davina' golj Jesucrístona', beena' wlej Chioza' kwenche yisle' cho' ben' Israel lawi dii mala' kon ka' bchebe' gone'. ²⁴ Na' ka zi' solo Jesúsza' wli' wsedile' ben', dii Juanna' golle' yog' ben' Israelka' chiyal' yiyaj yilengakile' xtoleeka' na' choagake' nisa'. ²⁵ Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': "Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmose' kwenche wlechj' xele'na'."

²⁶ Le' ben' bish', le' nakle xiin dia che dii Abrahama', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' laochoni daa cho'en dill' yisle' ben' kwenche bi kwiayi'gake'. ²⁷ Ben' Jerusalénka' na' ben' wñabia' che'ka' bi gokbe'gakile' bsel' Chioza' Jesúsza'. Ni bi wyajni'gakile' diika' bzej dii ben'ka' wdixjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'lwillgake'ne'. Na' daa wñagake' chiyal' guet Jesúsza', billinin daa bzej dii ben'ka' be' dill' daa goll Chioza' legake'. ²⁸ La'kzi bibi dii mal billelgakile' ben Jesúsza' dii gonan ka wchoglo-

gake' witgake'ne', wñabgakile' Pilátona' gone' mandad witgake'ne'. ²⁹ Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biletjgake'ne' lee yag cruza' na' jakwash'gake'ne'. ³⁰ Na' Chioza' bilise'ne' ladj ben' wetka'. ³¹ Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna'. Na' legaken' choe'lengakee ben' wlall chechoka' xtilleena' naa.

³² Na' chyixje'into' le' dill' wen dill' kob che Jesúsza' daa bcheb Chioza' lao dii xozxto'choka'. ³³ Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúsza' ladj ben' wetka'. Gok ka nyoj Salmo de wchopina', gana' nan: “Lin' nako' Xiin', na' naa, daa solo inabi'o na' inezi ben' nadaan nak' Xo'.” ³⁴ Chioza' ba bi'e dill' yilise'ne' ladj ben' wetka' na' bichga guete', na' wne': “Dii li gaklen' le' dii xen wal ka bcheb' lao dii Davina'.” ³⁵ Na' lezkka' sto Salmo nan: “Bi wi'o latj gooll' iteb beli chen cha'ni, daa nak' lall' no'.” ³⁶ Na' nezicho dii Davina' goklene' dii xozxto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xozxtoe'ka', na' gooll' bteb beli chen che'na'. ³⁷ Per kwerp che Jesúsza', beena' bisban Chioza' ladj ben' wetka', bi wlliyai'n. ³⁸ Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúsza'. ³⁹ Nottez ben' gonlilalleene' yiyake' ben' li ben' shao' lao Chioza'. Aga no yiyak ben' li ben' shao' lao Chioza' daa chone' daa na ley che dii Moiséza'. ⁴⁰ Na' li wsak' kwenche ki gak chele ka bzej dii ben'ka' be' dill' daa goll Chioza' legake' kani'yi, gana' nan: ⁴¹ Li wwia, le' ben' wenle. Li yibani. Wllin lla kwiayi'le daa bi chajle'le. Llaki mbanle gon' to dii wal dii bi shajle'le la'kzi shi no ina le' ki gak.

⁴² Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch ben'ka' bi nak ben' Israel wñabgakile'ne' we'lene' legake' cho'a xtill' Chioza' lla sabda' sto. ⁴³ Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiyal' soachehgake' gonlilall'gake' Chioza' daa le chakile' legake'.

⁴⁴ Na' ka bizoa xmanna' sto, llana' chombaan ben' Israelka', zi lat'z ki biya ben'ka' lle' yella' bdop kwenche wzenaggake' cho'a xtill' Chioza'. ⁴⁵ Na' ka ble'i ben' Israelka' ben' zan ndop nllag, na' gokxe'gakile' Páblona' na' wnegake' zban che dillaa cho'e, na' biya dii wnegake' che'. ⁴⁶ Na'ch Páblona' len Bernabéna' aga bllebgake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chidol'le gon Chioza' ye'l' mban chele zejli kani, na' solochoklanto' naa wzajniinto'n ben'ka' bi nak ben' Israel. ⁴⁷ La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' ben'ka' bi nak ben' Israel.

Na' yoo ben'ka' lle' doxen yell-lioni ka gongake' kwenche yilgake' na' bi kwiayi'gake'.

⁴⁸ Na' ben'ka' bi nak ben' Israel, ka bengakile' daa wna Páblona' len Bernabéna', le bibagakile' na' wnegake' le mba nak cho'a xtill' Chioza'. Na' yog' ben'ka' ba wlej Chioza' kwenche gat' ye'l' mban chegake' zejli kani benlilall'gake' Jesúsza'. ⁴⁹ Ka' gok blilj cho'a xtill' Xancho Jesúsza' doxen na'. ⁵⁰ Na' ben' Israelka', ben'ka' bi wyajle'gake' che Jesúsza', wlooyel'gake' bal' nooləwnia'ka', ben'ka' choe'la'o Chioza', na' ben' byoka' le zeyi cheyin

yella' kwenche bengakile' Páblona' na' Bernabéna' zban, na' bilaggake' legake' yell che'ka'. ⁵¹ Na'ch Páblona' len Bernabéna' ka biza'gake' wllib ni'eka' bishte che yella' daa bi goklall' ben'ka' lle' na' wzenaggake' che Chioza'. Na' wyajgake' yell Icóniona'. ⁵² Na' ben'ka' nonlilall' Jesúza' wzoachgagake' mbalaz, na' Espíritu Sántona' wnabi'e loo yichjlall'do'eka'.

14

Bllin Páblona' len Bernabéna' Icóniona'

¹ Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'lwillgake' Chioza'. Na' Chioza' goklene' legake' ka be'gake' cho'a xtilleena' kwenche ben' zan benlilall'gake' Jesúza', ka ben' Israel na' ka ben' bi nak ben' Israel. ² Na' ben' Israelka', ben'ka' bi goni shajle' che Jesúza', wlooyel'gake' bal ben'ka' bi nak ben' Israel kwenche gokzbangakile' ben'ka' nonlilall' Jesúza'. ³ Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllebgake', la' nxenilall'gake' zoalen Xancho Chioza' legake'. Na' Xanchona' goklene' legake' bli'gake' yel' wak che'na' kwenche gokbe'i ben' nan choe'gake' dill' li. ⁴ Na' ben' Icónioka' gogkake' chopla, bale' wda'gake' ben' Israelka' na' zi bale' wda'gake' Páblona' len Bernabéna'. ⁵ Na'ch ben' Israelka' bengake' txen ben'ka' bi nak ben' Israel na' gogkake' toz len ben' wnabia'ka', goklall'gake' yiya dii gongakile' Páblona' len Bernabéna' na' wlligake' legake' yaj. ⁶ Na' ka wnezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' lliia gana' mbani Licaóniana'. ⁷ Na' lekzka' be'gake' dill' wen dill' kob che Jesúza' na'.

Blligake' Páblona' yaj yell Lístrana'

⁸ Na' Lístrana' jadi'gake' to ben' nxinj ni'ena' ka goljtie'. Na' bi chak see daa bi chzoa chech ni'ena'. ⁹ Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see. ¹⁰ Na'ch golle'ne' zillj:

—Wzolla'.

Na' lii wzolla'tie' na' gok wzee. ¹¹ Ka ble'i ben' Lístraka' daa ben Páblona', wzolo chosyaagake' chnegake' xtilleeka' daa nak dill' Licaonia che'gake':

—jBa betj chios chechoka' gani zoacho na' chle'gakichone' ka benech!

¹² Na' wnagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa. ¹³ Na' bxoze che yoodo' che Júpitera', daa zoa katez choogake' yella', jwee goonka' na' nwalée legakb bga de jej, na' le', na' ben'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'. ¹⁴ Na' ka gokbe'i Bernabéna' len Páblona' bin gon ben'ka', na' wzologake' bchez' xe'ka', la' chakgakile' dii mal nllaban chon ben'ka'. Na' jsedogake' ladje'ka', na' wnegake' zillj, che'gake':

¹⁵ —Le' ben'do', jberache chonzle ka'? Lekzka' ben' yell-lioz neto', ka le', na' ba bidnto' kwenche wzajniinto' le' chiyal' kwejyichjle diiki bibi zak' na' gonlilall'le Chios, ben' yaa ben' banna', beena' ben yabana', yell-lioni, na' nido'na', na' yog' dii de xan yabana', lo yell-lioni, na' loo nido'na'. ¹⁶ Kani'yi Chioza' bwialoze' che benecha' bengake' kon daa nazan chegake'. ¹⁷ Na' la'kzi bwialoze' ka bengake', bliile' legake' ye' wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

¹⁸ Na' la'kzi Páblona' len Bernabéna' gollgake' ka', kanj goongakile' bi witgake' goonka' daa nan we'la'ogake' legake'.

¹⁹ Na' bllin bal ben' Israelka' zaak Antioquíana' na' Icóniona', na' wlooyel'gake' ben' Lístraka' kwenche bllia-gake' Páblona' yaja'. Na' daa gokgakile' ba witen', na'ch b̄xobgake'ne' jadixjgake'ne' cho'a yella'te. ²⁰ Na' ben'ka' nonlilall' Jesúsza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

²¹ Na' lekzka' wdixjeegake' dill' wen dill' kob che Jesúsza' yell Dérbena', na' ben' zan benlilall'gake' Jesúsza'. Na'tech, biza'gake' bidegake' yell Lístrana', Icóniona' na'ch Antioquíana'. ²² Na' to to yellka' gana' bidegake' btipgake' lall' ben'ka' ba chajle' che Jesúsza' kwenche soachehgake' gonlilall'chgake'ne'. Na' gollgake' chiyal' yizo yizakicho bittez dii yen ile'icho kwenche gak lljazoalencho Chioza' gana' chnabi'e. ²³ Na' to to yellka' wlelgake' to chop ben' koo lall' na'gake' ben'ka' ba nonlilall'gake' Jesúsza'. Na' wzoagake' wbas' be'lwillgake' Chioza', na'ch bengake' legake' lall' na' Xancho Jesúsza', beena' nonlilall'gake'.

Páblona' len Bernabéna' biyajgake' yell Antioquíana' daa llia gana' mbani Síriana'

²⁴ Na' wde Páblona' len Bernabéna' gana' mbani Pisídi-ana' na' bllingake' gana' mbani Panfílina'. ²⁵ Na' be'gake' cho'a xtill' Chioza' yell Pérgena'. Na'ch biza'gake' ziyagake' yell Atáliana'. ²⁶ Na' yell Atáliana' biyoogake' to loo barkw na' billingake' yell Antioquíana' gana' lle' ben'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'. ²⁷ Na' ka billingake' yell Antioquíana', btopgake' ben'ka' nonlilall' Jesúsza', na' gollgake' yog' daa goklen Chioza' legake' to

to yellka'. Na' lekzka' gollgake' ka ben Chioza' bi'e latj che ben'ka' bi nak ben' Israel kwenche benlilall'gake' Jesúza'. ²⁸ Na' Páblona' len Bernabéna' bigaangake' ssha yell Antioquíana' len ben'ka' nonlilall' Jesúza'.

15

Bidogake' Jerusalénna' na' be'gake' dill'

¹ Shlak zoa Páblona' len Bernabéna' yell Antioquíana', bllin bal ben' za' Judeana' na' wzologake' bli' bsedgak-ile' ben'ka' nonlilall' Jesúza' nan chiyal' gongake' ka na ley che dii Moiséza' na' sho'gake' sen daa le circuncisión kwenche Chioza' wi'e yel' mban chegake' zejli kani. ² Na' Páblona' len Bernabéna' gokdił-lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche llje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

³ Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka' nonlilall' Jesúza' ka ba wyanchga ben'ka' bi nak ben' Israel ba yoogake' lo xnez Chioza'. Na' ka beni ben'ki dga, le bibagakile'.

⁴ Ka bllin ben'ki Jerusalénna', ben'ka' nonlilall' Jesúza' len ben'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'. ⁵ Na' bal fariseoka' nonlilall' Jesúza' wzolla'gake' na' wngake':

—Ben'ka' bi nak ben' Israel chonan byen sho'gake' sen daa le circuncisión ka solo gonlilall'gake' Jesúza', na' chiyal' gongake' ka na ley che dii Moiséza'.

⁶ Na' bdop bllag postlka' len ben'ka' ngoo lall' na'gake' ben'ka' nonlilall' Jesúza' kwenche wwiagake' naklə ka sho' xnezi dga. ⁷ Ba gok ssha chdił cho'a xtilleeka' ka wzolla' Pédrona' na' golle' legake':

—Le', ben' bishaa, ba nezkzile kana' wlej Chioza' nad' ladjleni kwenche lji'a dill' wen dill' kob che Jesúza' lao ben'ka' bi nak ben' Israel kwenche gonlilall'gake'ne'. ⁸ Chioza', beena' nombi'e yichjlall'do' yog' ben', bli'e nan chlebe' ben'ka' bi nak ben' Israel daa bselee Espiritu Sántona' zoe' loo yichjlall'do'eka' kon ka bene' checho. ⁹ Toz ka ba ben Chioza' checho na' che ben'ka', la' lekzka' ba biyib bixise' loo yichjlall'do'eka' daa ba nonlilall'gake' Jesúza'. ¹⁰ Na' ¿berache bi chajle'le daa ba ben Chioza'?, na' ¿biche cheenile gon ben'ka' bi nak ben' Israel diiki? La' ni cho' ni dii xozxto'choka' bin' sakicho gonchon. ¹¹ Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹² Na' yoguee wzoagake' llizə bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yel' wakka' ladj ben'ka' bi nak ben' Israel. ¹³ Na' ka biyoll be' Páblona' len Bernabéna' dill', na'ch wne Jacóbona', golle':

—Le' ben' bish', cheenid' wzenagle dga inia' le': ¹⁴ Simón Pédroni ba bi'e dill' ka wzolo Chioza' wleje' ben' ladj ben'ka' bi nak ben' Israel kwenche gagkake' lall' nee. ¹⁵ Na' dga gok ka' chidił-lebin daa bzej dii ben'ka' wdixjee daa goll Chioza' legake' kani'yi, gana' nan:

¹⁶ Ka te dga, yiyed'

na' wzoa' to xiin dia che dii Davina' inabi'e.

La'kzi yel' wñabia' che'na' nakan ka to yoo dii ba biyinj, wllin lla yichisa'n.

¹⁷ Gon' dga kwenche yog' ben'ka' bin' gonlilall'gake' nad' yiyiljgake' nad',

lente yog'loḷ ben'ka' bi nak ben' Israel, ben'ka' ba nak lall' na'.

¹⁸ Kan' wna Xancho Chioza', beena' bzajniile' ben'ka' diiki kani'teyi.

¹⁹ 'Na'chan nia' le', bi chiyal' ye'cho ben'ka' bi nak ben' Israel, ben'ka' ba nonlilall'gake' Chioza', gongake' dii bi chonan byen. ²⁰ Kon wzejcho to yish ye'chogake' bich gaogake' yel' wawa' daa chllia ben' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool ben'. ²¹ La' kani'teyi zoakzə ben' to to yell chzajni'gakile' ben' ley che dii Moiséza', na' lənnan' ni chlabgake' naa gana' chdop chllaggake' choe'lwillgake' Chioza' yog' lla sabd.

Yisha' daa bsel'gake' lao ben'ka' bi nak ben' Israel

²² Na'ch postlka', na' yog' ben'ka' nonlilall' Jesúza' len ben'ka' ngoo lall' na' legake' bengake' toz dill' wlejgake' to chop ben' ladje'ka' kwenche shajlengake' Páblona' len Bernabéna' Antioquána'. Na' wlejgake' Judas, beena' lekzka' lie' Barsabás, na' Sílaza', nakgake' ben' mbejlawin ladj ben'ka' nonlilall' Jesúza'. ²³ Na' bsel'lengake' ben'ki to yish dii bzejgake', na' ki choe'n dill':

“Le' ben' bish' na' le' ben' zannto', le' bi nakle ben' Israel na' zoale yell Antioquána', na' doxen gana' mbani Síriana' na' Cilíciana', neto' postl na' ben'ki ngoo lall' na' ben'ka' nonlilall' Jesúza' Jerusalénni, na' yog' ben' bish'choki lle' ni, chwapnto' le' chiox. ²⁴ Ba wnezinto' ba bchej to chop ben' ladjnto'ni bidgake' to bia'lall'zgake' gana' zoale, na' benllejgakile' le' daa wnagake' chiyal' sho'le seṇ daa le circuncisión, na' chiyal' gonle doxen ka na leya'. ²⁵ Daan, ba bennto' toz dill' wlejnto' ben'ki chop ladjnto'ni zidwiagake' le'. Na' chsel'lennto' le-gake' Pábloni na' Bernabéni, ben' bish'choki le chakicho,

²⁶ ben'ki chzoa dii nxoll ye|' mban che'ka' daa chongake' xshin Xancho Jesucristona'. ²⁷ Na' chsel'nto' ben'ki le Judas na' Silas, na' legake' wzajni'gakile' le' dga chzejnto' le'. ²⁸ Na' wyazlall'nto' ka bzajni Espíritu Sántona' neto' bi wzoanto' le' gonle dii bi yizoile. Diikizə chakinto' chonan byen bi gonle: ²⁹ Bi gaole ye|' wawa' daa chllia ben' lao lwaa lsak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool ben'. Shi wzenagle diiki nannto' le', wenkzan chonle. Ka'tz nak dill'ki chzejnto' le'.”

³⁰ Na'ch ka bllin ben'ka' bsel'gake' Antioquíana', na' btopgake' yog' ben'ka' nonlilall' Jesúza', na' be'gake' legake' yisha' daa nox'gake'. ³¹ Na' ka blabgake'n le bibagakile' ka dillaa choe'n. ³² Na' ka nak Júdaza' na' Sílaza', daa lekzka' nakgake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'. ³³ Na' biyoll wzoalengake' legake' shloll wen, na'ch ben'ka' nonlilall' Jesúza' Antioquíana' mbalaz bilaagake' legake' dill' na' biyajgake' kwit ben'ka' bsel' legake'. ³⁴ Na' Sílaza' wyazlallee igaane' na'z. ³⁵ Páblona' na' Bernabéna' bigaangake' Antioquíana'. Na' len zan ben' yoblə bli' bsedchgakile' ben' cho'a xtill' Xancho Jesúza'.

Sto shii wyaj Páblona' yellka' gana' baji'e cho'a xtill' Chioza'

³⁶ Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawiacho nak chak che ben'ka' ba wyajle'.

³⁷ Na' Bernabéna' goklallee wche'gake' Juan, beena' lekzka' nsi'gake' Marcos. ³⁸ Na' bi gooni Páblona' wche'gake'ne', la' kana' bche'gake'ne' bixonje' na'

bkwaane' legake' Panfiliana', na' bich jenlene' legake' xshin Chioza'. ³⁹ Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'. ⁴⁰ Na' Páblona' wzee bchi'e Sílaza'. Na' ben'ka' lle' Antioquána', ben'ka' nonlilall' Jesúza', wñabgakile' Xancho Chioza' gaklene' legake' gattezə shajgake'. ⁴¹ Na' Páblona' len Sílaza' wdegake' gana' mbani Síriana' na' Cilíciana' kwenche goklengake' ben'ka' nonlilall' Jesúza' wzoatip wzoashoshchgake'.

16

Timotewa' bene' txen Páblona' len Sílaza'

¹ Na'ch Páblona' len Sílaza' bllingake' yell Dérbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakh' xiin to noolə Israel, na' nooli nonlilallee Jesúza', per xabaa nake' ben' griego. ² Na' ben' Lístraka' len ben' Icónioka' nonlilall' Jesúza' be'gake' dill' le wen nsa' cheb'. ³ Na' Páblona' wñabile'b' shajlem' legake', na' wlo'eb' sen daa le circuncisión kwenche bi gakzbani ben' Israelka' leb', la' ñezgakile' xabaa bi nake' ben' Israel. ⁴ Na' yog' yellka' gana' wdegake' be'lengake' ben'ka' nonlilall' Jesúza' dill' che diika' chiya' gongake', diika' be' postlka' dill' kon ben'ka' ngoo lall' na'gake' ben'ka' nonlilall' Jesúza' yell Jerusalénna'. ⁵ Na'ch ben'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to ben' Macedonia chñabile'ne' shaje' lalle'na'

⁶ Páblona' len Sílaza' na' Timotewa' to wdezgake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani

Ásiana'. ⁷ Na' ka bllingake' gaoz yell-lio gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'. ⁸ Na'ch wdegake' yell-lio che Mísiana' bllintegake' yell Tróaza' daa llia cho'a nisdona'. ⁹ Na' lo yela' Chioza' bene' ka ble'do'i Páblona' to ben' byo, ben' Macedonia, zie' chat'yoile'ne', chi'ene': “Dagach Macedóniani kwenche gakleno' neto'.” ¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' llje'lennto' ben'ka' lle' na' dill' wen dill' kob che Jesúza'.

Páblona' na' Sílaza' wyajgake' Filípoza'

¹¹ Na' yell Tróaza' wyoonto' barkwa' na' wyajnto' shl̥icha gana' llia to yell-lio lo nisdona' daa le Samotracia. Na' betiyo bllinnto' to yell dii le Neápolis. ¹² Na' wza'nto' Neápoliza' wyajnto' yell Filípoza'. Nakan to yell ga lle' ben' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shon lla. ¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'lwillgake' Chioza'. Na' jche'nto' na', be'lennto' dill' noolka' bdop bllag. ¹⁴ Na' ladj noolka' len to ben' le Lidia. Nake' ben' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'. ¹⁵ Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesúza', li sho' na' yigaanle lillaa.

Na' bene' byen jagaannto' lille'na'.

¹⁶ Na' to shii ka zejnto' gana' choe'lwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chneyaab'. Na' nakb' to bi' ndoo lla yel chom' xshin ben', na' dii xen chon xama'

gan daa chneyaab'. ¹⁷ Na'ch bi'ni wnob' Páblona' shlak zejlennto'ne', chosyaab' zillj, nab':

—Ben'kin chongake' xshin Chioza', beena' nak ben' choo ben' xen, na' chzajni'gakile' ben' nez li che Chioza' gana' sho'cho kwenche bi kwiayi'cho.

¹⁸ Na'ch kon ka' w nab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' w nabia' che Jesucrístona' nia' li' bichej.

Na' lii bichejte dii xiwaa.

¹⁹ Na' ka gokbe'i xam'ka' bich bi mech gongake' gan, na'ch bexgake' Páblona' len Sílaza' na' jwa'gake' legake' lao joschiska'. ²⁰ Na' ka bllinlengake' legake' lao joschiska', na' che'gake':

—Ben' Israelki chta chnegake' ben', lallchoni. ²¹ Na' chli' chsedgakile' ben' dii bi chiyal' goncho ni bi chiyal' wlebcho, cho' nakcho ben' Roma.

²² Na' ben' zan bdi'a na' wnegake' zban che Páblona' len Sílaza'. Na'ch joschiska' bchogbia'gake' wdingake' xe'ka' na' bet wdingake' legake'. ²³ Na' ka wde bet wdinchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'. ²⁴ Na' daa gollgake' beeni ka', wlo'e legake' bill' xyoote na' bni'e yen ni'eka' to lee kwag' dii nyidjgake'.

²⁵ Na' do ka chel Páblona' len Sílaza' choe'lwillgake' Chioza' na' cholgake' choe'la'ogake'ne', na' ben'ka' sto de lillyana' chzenaggake' ka chongake'. ²⁶ Na' tokonganzi wde to bedxo' xen wal na' bniban doxen lillyana'. Na' lii byaljten, na' gdenka' diika' nchejgake' ben'ka' de lillyana' tolazzin biyellgakan. ²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' ben'ka' de lillyana' ba billeshgake'. ²⁸ Na' Páblona' besyee, golle'ne':

Los Hechos 16:29 57 Los Hechos 16:40

—¡Bibi goni kwino'! Nikz lle' yog'nto'.

²⁹Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Sílaza', na' lii b̄chek'te xibe'na' lawe'ka' do chxizze' daa le b̄llebe'. ³⁰Na' lii bibejtie' legake' lillyana', na' chi'e:

—¿Le', ben'do', beran chiya' gon' kwen̄che bi kwiayaa?

³¹Na' gollgake'ne':

—Ben̄lilalloo Xancho Jesucristona', li' na' do xiin xoolo', kwen̄che yisle' le' na' bi kwiayi'le.

³²Na' be'lengake' le' na' ben̄'ka' zoa lille'na' cho'a xtill' Xancho Jesús'a'. ³³Na'ch beena' chap lillyana' wdibe' we'na' lliagake', la'kzi nakan wa' chel. Na' lekzka' yog'lo'tie' lii wchoategake' nisa'. ³⁴Na' bīchi'e Páblona' len Sílaza' lille'na' na' bweej bwawe' legake'. Na' le chibayi beeni do xiin xoolo' daa ba non̄lilall'gake' Chioza'.

³⁵Na' ka wyeeni', jos̄chiska' bsel'gake' ben' jellgake' beena' chap lillyana' yisane' legake' kwen̄che yiyajgake'.

³⁶Na' beena' chap lillyana' golle' Páblona':

—Ba bsel' jos̄chiska' ben̄'ki, na' nagake' ba de lsens yisan' le'. Na' wak yiyajle naa, kochno bi goni le'.

³⁷Na' Páblona' golle' legake':

—Neto' ndento' kwent yell Rómana', na' ni bi biy-iljni'agake' bin bennto' ba bet wdingake' neto' lao lkwe' ben' na' wdixjzgake' neto' lillyani. ¿Ana' naa cheenz-gakile' yisangake' neto' do ngash'zə? Yidch kwingake' yibejgake' neto'.

³⁸Na' jayellgake' jos̄chiska' daa goll Páblona' legake', na' jos̄chiska' le b̄llebgake' ka w̄nezgakile' Páblona' len Sílaza' ndegake' kwent ka ben' Roma. ³⁹Na'ch wyaj jos̄chiska' jaye'xengake' Páblona' len Sílaza' na' bibejgake' legake' lillyana', na' got'yogakile' legake' bich yigaangake' yella'. ⁴⁰Na' ka bichej Páblona' len Sílaza' lillyana', na'

biyajgake' lill Lídiana' jawiagake' ben'ka' ba nonlilall' Jesúza' na' btipchgake' lall'gake', na'tech biza'gake'.

17

Bta bne ben' malka' ben' Tesalónicaka'

¹ Na' ka biza' Páblona' len Sílaza', wdegake' yell Anffipoliza' na' yell Apolóniana', na' bllingake' yell Tesalónicana' gana' zoa yooná' gana' chdop chllag ben' Israelka' choe'lwillgake' Chioza'. ² Na' lo shon xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioza', ³ bzajniile' legake' Crístona', beena' wlej Chioza' inabi'e, benan byen biya dii wxak'zi'e na' wite', na' bibane' ladj ben' wetka'. Na' chi'e legake':

—Jesúza', beena' choe'len' le' xtilleena' naa, len' Crístona', beena' wlej Chioza' inabi'e.

⁴ Na' bal ben' Israelka' wyajle'gake' na' bengake' txen Páblona' len Sílaza', na' lezkka' zan ben' griegoka', ben'ka' ba choe'la'ogake' Chioza', wyajle'gake' che Jesúza', na' lezkka' zan noolka' zakii. ⁵ Na' ben' Israelka' bi wyajle', gokxe'gakile' Páblona' len Sílaza', na' btopgake' ben' wdallagka' nak ben' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaza' kwenche gongake' legake' lo na' ben' yellka'. ⁶ Na' daa bi zoa Páblona' len Sílaza' na', na'ch wdoygake' Jasónna' na' zi to chop ben'ka' nonlilall' Jesúza' na' jwa'gake' legake' lao joschiska'. Na' wnegake' zillj che'gake':

—Ben'ka' chda chbekgake' dii zed doxen yell-lioni ba bla'gake' yell chechoni. ⁷ Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto ben' wñabia' le Jesús.

⁸ Na' ben' yellka' len joschis che'ka' bllaagake' na' gokllesh'gakile'. ⁹ Na' wxenlall' joschiska' bllia Jasónna' mech len ben'ka' nakgake'ne' txen, na'ch bisangake' legake'.

Páblona' len Síłaza' wyajgake' Bereana'

¹⁰ Na' kon ka goł, ben'ka' nonłilall' Jesúza' bisa'dogake' Páblona' len Síłaza' kwenche yiyajgake' yell Bereana'. Na' ka bllingake' yella', lii wyajtegake' gana' chdop chllag ben' Israelka' choe'łwillgake' Chioza'. ¹¹ Na' ben' Bereaka' nakchgake' ben' wench aga ka ben' Tesalónicaka', na' bibagakile' bzenaggake' daa bzajni Páblona' len Síłaza' legake'. Na' yog' lla biyiljgake' lee Cho'a Xtill' Chioza' shi nakan ka daa chli' chsedgakile' legake'. ¹² Na' zan ben' Israelka' zoa na' ben'łilall'gake' Jesúza' na' ka'kzə zan ben' griegoka', ka ben' byoka' na' ka noolka' zakii. ¹³ Na'ch ben' Israelka' lle' Tesalónicana', ben'ka' bi ben'łilall' Jesúza', ka wnezgakile' Páblona' choe'lene' ben' Bereaka' xtill' Chioza', na'ch wyajgake' jata janegake' ben' yellka'. ¹⁴ Na' ben'ka' nonłilall' Jesúza' lii bsel'tegake' Páblona' cho'a nisdo'na'łə, na' Síłaza' len Timotewa' bigaangake' Bereana'zə. ¹⁵ Na' ben'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Síłaza' len Timotewa' wtalall'gake' shajgake' gana' zoe'.

Páblona' zoe' yell Aténaza'

¹⁶ Na' shlak chbez Páblona' Síłaza' len Timotewa' yell Aténaza', le bllaa yichje' daa ble'ile' to ni to na' nzoa ben' Aténaska' diika' choe'la'ogake'. ¹⁷ Ni cheyi daan bzajniile' ben' Israelka' gana' chdop chllaggake' choe'łwillgake' Chioza', na' len zi xonj ben' griego. Na' lekzka' yog' lla wyaje' gana' chak yaana' gana' lle' lla' ben' na' be'lene' legake' dill'. ¹⁸ Na' bał epicúreoka', ben'ka' chsedgake'

daa bli' bsemi beena' wle Epicúreo, len ba| estóicoka',
wzologake' wdil xtilleeka' len Páblona'. Na' ba|e' che':

—¿Beran naz beeni chshaljchgue'?

Na' zi ba|e' nagake':

—¿Aaga beenin zidyelene' cho' dillaa daa nan chiyal|
we'la'ocho sto chios yoblə?

Wnagake' ka' daa chyixje'i Páblona' legake' dill' wen
dill' kob che Jesús'a, chi'e legake' bibane' ladj ben|
wetka'. ¹⁹ Na'ch bche'gake' Páblona' to latj gana' nsi'gake'
Areópago ga chdopgake' choe'gake' dill', na' ka bllinlen-
gake'ne', che'gake':

—Cheeninto' inezinto' bi dii koban chli' chsedilo'. ²⁰ La'
ndantekzi nak dill'ki choo, na' cheeninto' inezinto' bi
zejin.

²¹ La' yog' ben| Aténaska' na' lekzka' ben| zit'ka' zoa
na', bichkzə bilə chongake', to chinozgake' bi dill' kob
wzenaggake' na' to xtillii daazə choe'gake' yog' lla.

²² Na'ch Páblona' wzie' ladje'ka' gana' nzi' Areópago,
na' golle' legake':

—Le' ben| Atenas, chakbe'id' le chibaile choe'la'ole
diika' noni chios chele. ²³ La' ba ble'id' yell cheleni
to to latj gana' chgoole diika' balaan, na' ble'id' to ga
da' to dill' dii na: “Che Chios, beena' kono nombia'.”
Na' beena' chgoole balaan la'kzi bi nombia'lene', dill'
che'nan' zidyel'len' le' naa.

²⁴ Chios, beena' ben yell-lioni na' yog' dii de lawinna'
nake' Xan yabana' na' yell-lioni. Aga zoe' loo yoodo' dii
choni ni'a na' ben|. ²⁵ Na' aga bi chyallji Chioza' dii inacho
gak gon ben| yell-liona' che'. La' len' nonē' yel| mban
che yog'lolcho, na' nonē' bishbe checho, na' yog' bi dii de
checho.

²⁶ Len' bxe bsile' to ben| yell-lio, na' yog'lolcho cho'
nakcho xiin dia che beena' bxe bsile', na' le'kze' ba nllie'

bia' ba_l yiz soacho yell-lioni na' gana' soa to tocho. ²⁷ Na' bzoe' cho' yell-lioni kwenche yiyiljcho nakan goncho gombia'chone'. Na' dii li ga_l' gllin zelen Chioza' to tocho, ²⁸ la' len' chone' ka mbancho na' ka chzo chdacho. Kan' bzej ba_l be_n' sin' cheleka', be_n'ka' w_nagake': "Nakcho xiin Chioza'." ²⁹ Na' daa nakcho xiin Chioza', bi chiyal' gakicho nake' to be_n' de or, de plat, de yaj, de yag, ka chaljlall' be_n'ka' chongake' diiki. ³⁰ Kana'teyi Chioza' bwialoze' ben be_n'ka' daa nazan chegake' ye_l' bi chajni che'ka', per naanlla chone' byen yog'lo_l be_n' lle' doxen yell-lioni yiyaj yilengakile'. ³¹ La' Chioza' ba bliie' bia' to lla gone' ye_l' joschis che to to be_n' lle' yell-lioni, na' gone' che to toe' kon ka chidolee. Na' ba bliile' cho' beena' wleje' gon ye_l' joschisa' daa bilise'ne' ladj be_n' wetka'.

³² Na' ka bengakile' wna Páblona' Chioza' chisbane' be_n' ladj be_n' wetka', ba_le' bxillgake', na' zi ba_le' gollgake'ne': —Sto llagalə wzenagnto' cho' cheyi dga choo dill'.

³³ Na' biza' Páblona' gana' lle' be_n'ka'. ³⁴ Na' ba_l be_n' bengake'ne' txen na' be_nlilall'gake' Jesúza'. Na' ladje'ka' len to be_n' lie' Dionisio, beena' len be_n'ka' zakii chdop latja' nzi' Areópago, na' lekzka' sto noolə lie' Dámáris, na' sto chop be_n' yoblə.

18

Biyaj Páblona' yell Coríntona'

¹ Ka wde biza' Páblona' yell Aténaza', na' biyaje' yell Coríntona'. ² Na' ka billine' Coríntona' billague' to be_n' Israel lie' Aquila. Na' beeni nake' be_n' yell Ponto na' nool che'na' lie' Priscila. Zi' bllinzgake' Coríntona' biza'gake' gana' mbani Itáliana', la' Claudiona', be_n' w_nabia'na', bisheshe' yog' be_n' Israelka' Rómána' gana' zoe'. Na' Páblona' jawie' legake', ³ na' daa nlangake' toz ka llin, bigaanlene' legake', na' wdiagake' yid xa bayix'ka' daa

chchingake' lwaá yoo. ⁴ Na' yog' lla sabd, Páblona' chaje' gana' chdop chllag ben' Israelka' choe'lwíllgake' Chioza', na' chzajniile' ben'ka' lle' na' xtill' Jesúza', ka ben' Israel na' ka ben' bi nak ben' Israel.

⁵ Na' Síłaza' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' ben' Israelka' nan Jesúza' nake' Crístona', beena' wlej Chioza' inabi'e. ⁶ Per wzololəgake' chakdil-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkan wliayi' kwinle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

⁷ Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'lwíllgake' Chioza'. ⁸ Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllaggake', na' do xiiñ xoole' wyajle'gake' che Xancho Jesúza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'. ⁹ Na'ch to lle' bli'lao Xancho Jesúza' Páblona', na' golle'ne':

—Bi illebo'. Be'ch xtillaana' lao ben'ki na' bi so' llizə. ¹⁰ Nad' zoalen' li', na' bi wi'a latj no bi goni li', la' ben' zan zi' gombia'gake' nad' yelli.

¹¹ Na' bigaan Páblona' Coríntona' twiz yoo gashj bli' bsedile' ben' cho'a xtill' Chioza'.

¹² Na' kana' chñabia' beena' le Galión gana' mbani Acáyana', ben' Israelka' gokgake' toz bex'gake' Páblona' na' bche'gake'ne' gana' chon Galiónna' yel' joschisa'.

¹³ Na' che'gake' Galiónna':

—Beeni chde' chgooyelee ben' kwenche we'la'ogake' Chioza' nlla'lə aga ka na ley che Rómana' daa chnabia' cho'.

¹⁴ Ka nan ine Páblona', lii wnete Galiónna' ben' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'. ¹⁵ San shi chaole xya che dill' daa cho'e, na' daa chzetje' le ben', na' che ley chelena', bi nakan ka dii gon' yel' joschis cheyin. Le'zə, li wwia naklə gonlen.

¹⁶ Na' bibeje' legake' gana' chone' yel' joschisa'. ¹⁷ Na' ch yog' ben' griegoka' bex'gake' Sósteneza', beena' chgoo xnezin cheyi diika' chon ben' Israelka' gana' chdop chllaggake' choe'lwillgake' Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' ben'ka' nonlilall' Jesúza' na' bizee kwenche shaje' gana' mbani Síriana'. Na' Priscílana' len Aquílana' zejlangake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'. ¹⁹ Ka bllingake' yell Éfesona', Páblona' bikwaanze' Priscílana' len Aquílana', na' wzee wyaje' gana' chdop chllag ben' Israelka' choe'lwillgake' Chioza' na' be'lene' ben'ka' dill'. ²⁰ Na' ben'ka' ndop nllag na', wñabgakile' Páblona' yigaanlenche' legake', na' Páblona' bi goonile'. ²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw. ²² Na' ka betje' barkwa' Cesareana', wyaje' Jerusalénna' jawape' chiox ben'ka' nonlilall' Jesúza'. Na' bizee biyaje' Antioquíana'.

²³ Na' bigaanē' shloll, na'tech wzee wyaje' sto shii to to yell

gana' mbani Galáciana' na' Frígiana' jatipche' lall' ben'ka' nonlilall' Jesúza'.

Apóloza' bi'e xtill' Chioza' Éfesona'

²⁴ Na' do kana' bllin to ben' Israel Éfesona' lie' Apolos, ben' golj yell Alejandríana'. Na' chak cho'e dill' lao lkwe' ben', na' le nsede' Cho'a Xtill' Chioza'. ²⁵ Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bse di Juanna' che daa chchoa ben' nisa'. ²⁶ Na' Apóloza' bi bllebe' bi'e dill' che Jesúza' gana' chdop chllag ben' Israelka' choe' lwillgake' Chioza'. Na' ka beni Priscílana' len Aquílana' ka chli' chsedi Apóloza', na'ch bi'che'gake'ne' kwenche bzajni' chgakile'ne' kwasloj ka nak xnez Chioza'. ²⁷ Ka goki Apóloza' shaje' gana' mbani Acáyana', ben'ka' nonlilall' Jesúza' btipgake' lallee na' bzejgake' to yish dii bexee che ben'ka' nonlilall' Jesúza' na', kwenche wleb-gake'ne'. Na' ka blline', le goklene' ben'ka' ba biyesh' lallii Chioza' kwenche nonlilall'gake' Jesúza'. ²⁸ Na' bli' bse dile' ben' nan klelan chajni ben' Israelka' che Jesúza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na Jesúza' nake' Crístona', beena' wsel' Chioza' inabi'e.

19

Ka wzoa Páblona' Éfesona'

¹ Na' shlak wzoa Apóloza' Coríntona', Páblona' wdie' to to yellka' lliá ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e bal' ben' ba nonlilall' Jesúza'. ² Na' wnable' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonlilall'le Jesúza'?

Na' ben'ka' gollgake'ne':

—Ni bi ne_zinto' shi zoa Espíritu Sántona' beena' no' ka'.

³ Na'ch Páblona' wiznabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴ Na'ch goll Páblona' legake':

—Dii Juanna' bzajniile' ben' chiya! choagake' nisa' daa wli'n ba biyaj bilengakile' na' lekzka' golle' legake' chiya! gonlilall'gake' beena' zi' yid, na' len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'. ⁶ Na' ka bxo_a na' Páblona' yichje'ka', Espíritu Sántona' wyo'e loo yichjlall'do'eka' na' wnegake' wde wdeli dill' na' lekzka' wdixje'gake' dill' daa goll Chioza' legake'. ⁷ Na' ben'ki gok cheyin ka' nakgake' ka do shlin.

⁸ Na' wzoa Páblona' Éfeson_a' shon beo' bli' bsedile' ben' Israelka' gana' chdop chllaggake' choe'llwillgake' Chioza' na' bi bblebe'. Na' be'lenche' ben'ka' dill' kwenche wyajni'gakile' ka chn_abia' Chioza' loo yichjlall'do' ben'ka' nonlilall'gake'ne'. ⁹ Na' bal ben'ka' nak ben' lall'do' wal aga goongakile' shajle'gake', na' biya dii wnagake' lao lkwe' ben' che nez li nez shao' che Jesucríston_a'. Na'ch biza' Páblona' kwite'ka', na' bichi'e ben'ka' ba nonlilall' Jesúza', wyajlene' legake' lill to ben' le Tirano dii nak ka yoo skwel gana' chdi'a ben', na' bli' bsedchile' legake' yog' lla. ¹⁰ Gokte chop yiz bli' bsedile' legake', na' yog'lol ben'ka' lle' doxen Ásiana' bengakile' xtill' Xancho Jesúza', ka ben' Israel ka ben' griego. ¹¹ Na' Chioza' bchine' Páblona' kwenche bene' ye! wak xen dii benan ka bibanchgayi ben'. ¹² Na' axt no bachyichj, no lech' chjatigake'ne' na' chiyox'gake'n ga de ben' bi shao' na' chiyakgakile', na' lekzka' chichej dii xiwaa yoo ben'.

¹³ Na' ba_l be_n' Israelka' chdagake' to to yell chibejgake' dii xiw'ka' yoo be_n', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴ Ka' ben gall xiin to be_n' Israel le Esceva, beena' nak to w_nabia' che b_xozka'. ¹⁵ Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi ne_zid' no le'.

¹⁶ Na'ch beena' yoo dii xiwaa bxitee b_nize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'. ¹⁷ Na' yog' be_n'ka' zoa Éfesona', ka be_n' Israel ka be_n' bi nak be_n' Israel, wnezgakile' ka gok che be_n'ka', na' le bllebgake' na' wloochgake' Xancho Jesúza' balaan.

¹⁸ Na' zan be_n'ka' ba nonlilall'gake' Jesúza' jaxoadol'gake' lao lkwe' be_n' ka nak dii malka' ba bengake'. ¹⁹ Na' zan be_n'ka' blan yel' willa'na' jwa'gake' libr che'ka' daa bsedgake' na' bzeygake'n lao yog' be_n'ka'. Na' bengake' kwent ka'k' zak' librka' bzeygake', na' bllinan ka do shiyona mil mech plat. ²⁰ Ka' gok bliljch xtill' Xancho Jesúza' na' be_n' zanch benlilall'gake'ne' daa gokbe'gakile' xtill' Chioza' nsa'n yel' wak xen.

²¹ Na' ka wde gok yog' diiki, Páblona' bchogllalee shaje' lljawie' be_n'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': “Ka yiyoll yiyaa Jerusalénna' chiya' shaa Rómana'.” ²² Na'ch bselee Timotewa' na' Erástona' Macedóniana', be_n'ki chop chaklengake'ne', na' le' bigaane' Ásiana' zi shloll wen.

Bta b_ne Demétriona' be_n' Éfesoka'

²³ Na' got' to dii zed wal Éfesona' daa chli' chsedi Páblona' che nez li nez shao' che Jesucristona'. ²⁴ Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len ben'ka' chonlengake'ne' llinna'. ²⁵ Na' btope' ben'ka' chonlene' llinna' na' yog' ben'ka' nlangake' llin ka daa, golle' legake':

—Nezile llin dga nlancho dii xen chkwaanān checho.

²⁶ Na' ba chen chle'ile ka chon beena' le Pablo, chde' chzajniile' ben' wllall chechoki na' doxen gani mbani Ásiani, chi'e aga bi zakii lwaa lsak' dii chon ben' kwenche we'la'ozgake'n. Na' ben' zan ba chzenaggake' che'. ²⁷ Na' nxoll bich too diiki choncho, na' lekzka' nxoll bich seyi che yoodo' gana' zoa xnax Diana chechona', beena' nak ben' choo ben' xen. Na' beeni choe'la'o yog'zə ben' lle' gani mbani Ásiani na' ben' lle' doxen yell-lioni, gongak-ile'ne' ka to ben' bibi zakii.

²⁸ Ka goll Demétriona' legake' ka', le bllaagake' na' besyaagake', nagake':

—¡Ben' choo ben' xen nak xnax Diana chechona', cho' ben' Éfeso!

²⁹ Na' yog'lole' gokgake' toz, wlekgake' dii lchix wal yella', na' bex'gake' chop ben' Macedonia, toe' le Gayo, na' stoe' le Aristarco, ben'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'. ³⁰ Na' Páblona' gokile' sho'e ladj ben'ka' ndop nllag na' kwenche nan we'lene' legake' dill', per ben'ka' nonjilall' Jesúsza' aga be'gake' latj sho'e. ³¹ Na' lekzka' ladj joschis che ben' Ásiaka' len ben' nllagui Páblona', na' bse'l'gake' rson, che'gake'ne':

—Ben goklen, bi shoo gana' lle' ben'ka'.

³² Na' ben'ka' ndop nllag na' chosyaagake', wde wdeli dii na to toe'. Na' zan ben'ka' len ladje'ka' ni bi nezgakile' biche lle'zgake' na'. ³³ Na' bal ben' Israelka' bllig'gake' Alejándrona' lao ben'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'. ³⁴ Na' ka ble'gakile'ne' na' gokbe'gakile' nan ben' Israelan, na'ch bizologake' chosyaagake', nagake':

—¡Ben' choo ben' xen nak xnax Diana chechona', cho' ben' Éfeso!

Ka do chop gor besyaagake' che'gake' ka'.

³⁵ Na'ch beena' nak sikriban che yella' bzoe' legake' llizə. Na'ch golle' legake':

—Le' ben' wllall, yog' ben' yell-lío nezgakile' cho' ben' Éfeso chido! cho gap wwiacho yoodo' che xnax Diana chechona', beena' nak ben' choo ben' xen. Na' nezgakile' lwaa lsakeena' za'n yabalə, ³⁶ na' ni to kono gak ina aga kan' nakan. Na' li soa llizə kwenche bi gonle to dii bi chiya! gonle. ³⁷ Ka nak ben'ki ba bidwa'le ni, bi inacho ba wlan-gake' bi de loo yoodo' chechona', ni bi inacho ba wnegake' zban che xnax Diana chechona'. ³⁸ Na' shi Demétrioni na' ben'ka' chonlengake'ne' llinna' de dii chak chegake' kon nottezə ben', daan chi' ben'ka' chchoglogake' che ben' na' wak shajgake' lawe'ka' kwenche gongake' yel' joschis che'ka'. ³⁹ Na' shi bichlə dii cheenile gak, chiya! yitopcho yog'lol ben' yell na' we'chon dill'. ⁴⁰ La' ka nak dga gok naa, nxoll ina ben' to cho'zan chta chnecho ben' yell, na' jbera inacho shi ba chnabgakile' cho' che dga ba gok naa?

⁴¹ Ka wde golle' legake' ka', na' bisheshe' legake'.

¹ Na' ka bibe'lli daa ben ben' Éfesoka', na'ch gox Páblona' ben'ka' nonlilall' Jesúza' na' be'lene' legake' to chop dill' dii gaklenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'. ² Na' bidie' to to yellka' llia Macedóniana' na' be'lene' ben'ka' nonlilall' Jesúza' zan dill' dii btipan lall'gake'. Na' biyolla' billine' Gréciana', ³ na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchogllalee bigwee nez kon ni'aze ziyaje' Macedóniana'lə. ⁴ Na' ben' zan zejlelake' Páblona' Ásiana'. Laje'ka' len Sópatera' xiin Pírrona', ben' Bereana'; na' Aristárcona' len Segúndona', ben' Tesalónicaka'; na' Gáyona', ben' Dərbena'; Timotewa', na'ch Tíquiconá' len Trófimona', ben' Ásiaka'. ⁵ Na' yog' ben'ki wllialogake' laonto'na', na' wlezkake' neto' yell Tróaza'. ⁶ Na' ka wde lni Paskwa' kat' chaogake' yetxtila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez ben'ka' neto'. Na' wzoanto' na' gall lla.

Billin Páblona' yell Tróaza'

⁷ Na' ka bllin lla dmiwa', lla nech che xmanna', bdop bllagnto' weej wdaonto' txen len ben'ka' nonlilall' Jesúza', na' Páblona' bli' bsedile' legake'. Na' daa ba nakan yizee yetiyo, axt chelch wyeelo be'lene' legake' dill'. ⁸ Na' ndop nllagnto' to loo yoo dii llia shkwia cha'lə, na' nakan bido yi'zi. ⁹ Na' to bi' wew' lliab' cho'a ventanna', na' leb' Eutico. Na' daa bshaljlen Páblona' ben'ka' ssha, bex'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'. ¹⁰ Na'ch

biyetj Páblona', na' ka blline' gana' jadixjgake'b' bchekee wdele'b'. Na' golle' ben'ka':

—Bi illeble; mbankzba'n.

¹¹ Na'ch biyep Páblona' dii yoblə, bxoje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee. ¹² Na' ka billesh ben'ka', chibagakile' biche'gake' bi' wewaa shi'a shbam'.

Biza' Páblona' Tróaza'

¹³ Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'. ¹⁴ Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. ¹⁵ Na'ch biza'nto' Mitilénena', na' betiyo bidento' gaozə yell-lio Quíona' daa llia lo nisdona'. Na' gok lillj billinnto' yell-lio Sámoza' daa llia lo nisdona', na' llana' sto wyajchnto' yell Milétona'. ¹⁶ Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' lni Pentecostéza'.

Billag Páblona' ben'ka' ngoo lo na'gake' ben'ka' nonlilall' Jesúza' Éfesona'

¹⁷ Na' ka zoanto' Milétona', Páblona' bselee rson na' goxe' ben'ka' ngoo lo na'gake' ben'ka' nonlilall' Jesúza' Éfesona'. ¹⁸ Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani. ¹⁹ Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' ben' Israelka' nad'. ²⁰ Na' aga ni che ka' bsan' bich wnia' le' daa chiyal' inezile, san bli' bsedchkzid' le' gana' chdop chllagle na' ka'kzə lill to tole. ²¹ Ka ben' Israel ka ben' bi nak ben' Israel, be'lengakee dill' nan chiyal' yiyaj yilengakile' che dii malka' chongake'

lao Chioza' na' gonlilall'gake' Xancho Jesucristona'. ²² Na' naa, Espiritu che Chioza' chone' byen yiyaa Jerusalénna', na' bi nezid' bi gak cha' na'. ²³ Zeelo dii nezid', Espiritu Sántona' ne' nad' to to yell gana' tia' gataa lillya na' biya dii gak cha'. ²⁴ Na' aga bi chakid' cheyi diika' gak cha', la' aga llialo yel' mban cha'ni, san lliarote yiyoll gon' yog'lol daa ben Xancho Jesús'a lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

²⁵ 'Na' ba bzajniid' le' ka chon Chioza' chnabi'e loo yichjlall'do' ben' chonlilalleene', na' naa ni stole le' bich ile'ile nad' yell-lioni. ²⁶ Daan nia' le' naa, aga bi dol' nap' shi nole kwiayi'. ²⁷ La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'. ²⁸ Na' li wsak', li gap wwia ben'ka' nakle txen, la' Espiritu Sántona' wleje' le' kwenche gap wwiale ben'ka' nonlilall' Xancho Jesús'a, ben'ka' biya'o bizi'lene' xchene'na' daa blalje' lee yag cruza'. ²⁹ La' nezid' kat' bich soalen' le' na' yid ben' gonllejgakile' le' kwenche kwej yichjle daa nonlilall'le Jesús'a. Gongake' ka ba znia, ba chjatao xil'do' che ben'. ³⁰ Na' ladjlena' ichej ben' wli' wsedile' le' daa bi nak shli kwenche gonlene' txen. ³¹ Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

³² 'Na' naa, chon' le' lo na' Chioza' len cho'a xtilleena' daa na le chakile' cho'. La' lennan' napan yel' wak kwenche gaklennan le' soachehle gonlilall'lene'. Na' ka' lljazoalene' txen len yog' ben' nakgake' lall' nee. ³³ Nezkzile bibin' selallaa chele, ni xmechle, ni xalaanle, ni bichlæ dii naple. ³⁴ Na' nezkzile ni'a na'ni benlen' llin kwenche bllelid' bi dii byalljenid' ben'ki chonlengake' nad' xshin Chioza'. ³⁵ Ben' llinna' kwenche bliid' le' ka

chiyal' gakencho ben' kat' bi chyalljgakile'. La' chiyal' lljadinicho xtill' Xancho Jesúsza' kana' wne': "Mbalazch soacho shi we'cho ben' bi we'chone', aga ka daa ikaacho bi dii gone' cho'."

³⁶ Na' ka biyoll be'len Páblona' legake' dill', na'ch bçhek' xibe'ka' be'lwillgake' Chioza'. ³⁷ Na' yog'gake' wchell, na' wdel'gake' Páblona' na' bnopgake'ne'. ³⁸ Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

21

Biyaj Páblona' Jerusalénna'

¹ Na' ka bilaanto' ben' Éfesoka', na'ch biyoonto' loo barkwa' ziyajnto' shlichá yell-lio Coza' daa llia lo nisdona', na' betiyo billinnto' yell-lio Ródaza' daa llia lo nisdona', na' biza'nto' billinnto' yell Pátarana'. ² Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. ³ Na' ka zejnto' loo barkwa' ble'into' yell-lio Chíprena' daa llia lo nisdona' na' to wdeznto' shlaana'lə zejnto' yell Tírona' daa llia gana' mbani Síriana'. Na' ka billin barkwa' Tírona', biłetjgake' yoa'na' noa'n na' biyetjnto'. ⁴ Na' jadiljnto' ben'ka' nonlilall' Jesúsza' na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'. ⁵ Na' ka gok to xman biza'nto'. Na' yog' ben'ka' ba nonlilall' Jesúsza' yell Tírona', do xiiñ xoolgake', wza'lengake' neto' cho'a yella'. Na' ka bllinnto' cho'a nisdona', bçhek' xibnto' be'lwillnto' Chioza'. ⁶ Na'ch biłaa ljwellnto' dill', na' biyoonto' loo barkwa', na' ben'ka' biyajgake' lill che çhegake'.

⁷ Na' biza'nto' Tírona' billinnto' yell Tolemáidana', na' bwapnto' chiox ben'ka' nonlilall' Jesúza' na', na' bi-gaanlennto' legake' shlla. ⁸ Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen ben'ka' gall chaklengake' postlka', na' bigaannto' lille'na'. ⁹ Na' zoa tap bi' nool wew' che', na' chyixje'gakb' daa che' Chioza' legakb'. ¹⁰ Na' ka ba gok shon tap lla zoanto' lille'na', na' bla' to ben' Judea lie' Ágabo, ben' chyixjee daa che' Chioza' le'. ¹¹ Bidwie' neto' na' wñabe' xpachlee Páblona' na' bichej ni'a na' kwine', na' chi'e:

—Ba bzajnií Espíritu Sántona' nad' ne' ben' wlallka' lle' Jerusalénna' wchejgake' ni'a na' xan bachleeni ka ba nchej' ni'a na'ni, na' gongake'ne' lo na' ben'ka' bi nak ben' Israel.

¹² Na' ka beninto' wna Ágabona' ka', neto' len ben' Cesareaka' got'yointo' Páblona' bi yiyaje' Jerusalénna'.

¹³ Na' Páblona' wne' neto':

—Bi kwell-le cha', bi gonle ka gakyeshid'. Zoakz' wtil' diika', aga toz daa wchejgake' nad', san wakte witgake' nad' daa nonlilallaa Xancho Jesucrístona'.

¹⁴ Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesúza'.

¹⁵ Na' ka wde, bisini'a chento' kwenche biza'nto' ziyajnto' Jerusalénna'. ¹⁶ Na' bal ben' Cesareaka' nonlilall' Jesúza' wza'lengake' neto'. Na' bche'gake' neto' lill to ben' le Mnasón, gana' yigaañnto'. Beeni nake' ben' Chipre na' ssha ba gok nonlilallee Jesúza'.

Páblona' jawie' Jacóbona' Jerusalénna'

¹⁷ Na' ka billinnto' Jerusalénna', le chibayi ben'ka' naknto' txen nonlilall'nto' Jesúza'. ¹⁸ Na' betiyo wza'len

Páblona' neto' jawianto' Jacóbona'. Na' ka bllinnto', ba lle' yog' ben'ka' ngoo lo na'gake' ben'ka' nonlilall' Jesúza' Jerusalénna'. ¹⁹ Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj ben'ka' bi nak ben' Israel. ²⁰ Na' ka wde bzenag-gake' diika' wna Páblona', be'la'ogake' Chioza'. Na'ch gollgake'ne':

—Li', ben' bish', nezczilo' ben' zan wal inleeb ben' Israelka' ba nonlilall'gake' Jesúza', na' yoguee nagake' chonan byen goncho daa na leya'. ²¹ Na' ba bengakile' rson ka chono', na' nagake' chzajniilo' yog' ben' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sen daa le circuncisión, na' bich gongake' daa yoolocho choncho. ²² ¿Nakra gonchon, lla? La' lii idop illagte ben' kat' inezgakile' ba biyedo'. ²³ Wاكلja gono'n ki: Ladjnto'ni zoa tap ben' nchebe' to dii nchebe' lao Chioza', na' chonan byen wdelazgake' daa nchebgake'. ²⁴ Chiyal' wchi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gag wshib yichje'ka' ka nllia leya' bia'. Na' shi gono' ka', yog' ben' inezgakile' bi nakan ka nagake' cho', na' gakbe'gakile' lezkka' chzenago' daa na leya'. ²⁵ Na' ka nak ben'ka' bi nak ben' Israel na' ba nonlilall'gake' Jesúza', ba bzejnto' legake' bi kwe' yichjgake' diika' zejlencho cho' ben' Israel. Na' gollnto'gake' daa chiyal' gongake': bi gaogake' yei' wao daa ba bllia ben' lao lwaa lsak' daa choe'la'ogake', na' bi gaogake' xchen bayixaa, ni xpel' bana' bi wlalj xchema', na' bi inelenzgake' xiin xool ben'.

Bex'gake' Páblona' yoodo'na'

²⁶ Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenche wzenile' bxozka' bi llan sheelo daa ba nchebgake' kwenche ka yiyoll yixi

yiyechgake' ka nllia leya' bia' na' we'gake' bayix'do'ka' witgake'.

²⁷ Na' ba zoa iza a gall lla chongake' daa chiya'l' gongake' kwenche yixi yiyechgake', na' ba| ben' Israelka', ben'ka' zaak Ásiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenche bex'gake' Páblona'.

²⁸ Na' wnegake' zilljə che'gake':

—Le', ben' Israel, li gaklen neto'. Beeni chde' doxen chli' chsedile' ben' kwenche gakzbangakile' cho' ben' Israel, len ley chechona' na' yoodo' chechoni. Na' naa sto dii zban wal ba bizone', ba wlo'e to chop ben' griego yoodo' chechoni, la' bi de lsens sho' ben'ki lill xlatj Chios chechona'.

²⁹ Wnagake' ka' daa ba ble'gakile' Trófimona', to ben' yell Éfeso, chdalene' Páblona' txen Jerusalénna', na' gokgakile' lekzka' bche' Páblona'ne' yoodo'na'.

³⁰ Yog'z ben' lle' yella' bllesh bcheengake' zejdogake'. Na'ch bigoyogake' Páblona' axt de xneze' bibejgake'ne' yoodo'na', na' lii bsejtegake' puertka'. ³¹ Na' ba llagdia'gake' Páblona' cheengakile' wittekgake'ne' ka bllin dillaa lao ben' wñabia' che soldadka' nan chak dane nllleb doxen yell Jerusalénna'. ³² Na' lii btoptie' soldadka' na' ben'ka' ngoo lall' na' legake' na' wyajdogake' gana' lle' ben'ka'. Na' ben'ka' chit Páblona' ka ble'gakile' ben' wñabia'na' len soldad che'ka', na'ch bsangake' bich bet wdingake'ne'. ³³ Na'ch jabig' ben' wñabia'na', na' bexee Páblona' na' bene' mandad bchejgake'ne' chop gden. Na'ch wñabile' ben'ka' no beena' na' bin bene'. ³⁴ Na' ben'ka' kon chosyaagake' na' chiya dii na to toe', na' bi wyajni ben' wñabia'na' daa zi'te chongake' sshag. Na'ch bene' mandad biche' soldadka' Páblona' gana' zoagake'. ³⁵ Na' ka bllingake' cho'a shkwiaka' lle' cho'a lill soldadka' benan byen bñen soldadka' Páblona' daa zej ben' Israelka'

cheengakile' w̄nizgake'ne'. ³⁶ Na' beṅ' zan nogake'ne' chosyaagake', che'gake':

—ḷi w̄ittegue'!

Páblona' cho'e dill' lao beṅ' Israelka'

³⁷ Na' ka ba zoa llj̄oogake' Páblona' gana' zoa lill soldadka', na'ch golle' beṅ' w̄n̄abia'na':

—ḷAwak we'len' li' to ch̄op cho'a dill'?

Na' beṅ' w̄n̄abia'na' golle'ne':

—ḷAchako' dill' griegona'? ³⁸ ḷAaga lin' beṅ' Egíptonā' beena' wzoshiyi' beṅ' w̄n̄abia'ka' kani batzə, na' b̄chi'e tapa mil beṅ' wen xyaka' latja' gana' bibi chashj ch̄leb?

³⁹ Na'ch goll Páblona'ne':

—Aga l̄e' nad'. Nad' nak' to beṅ' Israel, beṅ' yell Tarso dii nak to yell xen gana' mbani Cilíciana'. Ben goklen be' latj we'len' beṅ'ki dill'.

⁴⁰ Na' beṅ' w̄n̄abia'na' bi'e lsens. Na'ch wze Páblona' lo shkwiaka' na' bze neena' lawe'ka' kwen̄che soagake' llizə. Na'ch ka wche'lligake' na' wzoloe' be'lene' l̄egake' dill' hebrewa' daa nak xtill'gake', chi'e:

22

¹ —Le' beṅ' bish', na' le' beṅ' gol, ḷi wzenag dill' ch̄a'ni wi'a.

² Na' beṅ'ka', ka bengakile' ch̄ne Páblona' dill' hebrewa' na' wle'gake' llizə. Na' Páblona' chi'e l̄egake':

³ —Nad' nak' beṅ' Israel na' golj' yell Társona' gana' mbani Cilíciana', per bgol' Jerusalenni, na' bli' b̄sedi maestro Gamaliela' nad' kwas̄l̄ol̄ ka na ley ch̄e dii x̄ox̄to'choka', na' toshiizi choe'l̄-lallaa chon' ka chazlall' Chioza' do yichj do lallaa, ka chonkzle le' n̄aanlla. ⁴ Na' b̄chi' bsakaa beṅ'ka' ba wyoo lo nez ḷi nez shao' ch̄e Jesucrístona' na' goklallaa guetgake'. Na' b̄exaa ka nool ka beṅ' byo, na' wlo'a l̄egake' lillyana'. ⁵ Beena' nak

b̄xoz choo b̄xoz xen na' yog' beṅ' golka' chṅabia' beṅ' Israelka' neṅgakile' ka ben'. Na' legake' beṅgake' nad' yish daa beṅxaa ka wzaa zyaa yell Damáscona', gokid' lljexaa yog'lol beṅ'ka' nogake' xtil' Jesucrístona' na' yiche'gakee Jerusalénni kwenṅche sak'zi'gake'.

Be' Páblona' dill' ka gok beṅ'ilallee Jesúsza'

(Hch. 9:1-19; 26:12-18)

⁶ Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa. ⁷ Na' to wzoatishz' lo yona'. Na'ch benid' shii to beṅ' wne' nad': “Saulo, Saulo, ¿beraṅche chṅchi' chsak'zo' nad'?” ⁸ Na' wṅabidee, chepee: “¿No li', beṅ'?” Na' wne': “Nadaan Jesús, beṅ' Nazareta', beena' chṅchi' chsakoo.” ⁹ Na' beṅ'ka' zyaalen' txen ble'gakile' yi'na' daa wyalj na' bllēbgake', per aga bengakile' daa wna beena' nad'. ¹⁰ Na'ch goshee: “¿Beran chiyal' gon', Xan'?” Na' wne' nad': “Biyas na' wyaj Damáscona', na' na' inagake' li' yog' daa chiyal' gono'.” ¹¹ Na' beeni' wala' bṅholan nad', na' beṅ'ka' zyaalen' txen biyox'gake' na'na' na' bṅche'gake' nad' Damáscona'.

¹² Na' Damáscona' zoa to beṅ' le Ananías, na' zoe' chone' yog' daa na leya', na' yog' beṅ' Israelka' zoa Damáscona' nagake' che' nake' to beṅ' chon dii wen. ¹³ Na' Ananíaza' bide' bidwie' nad', na' ka blee, wne' nad': “Saulo, beṅ' bish', ṅaa yile'ilo' sto shii.” Na' kate wne' ka', lii bile'teid', na'ch gok ble'idee. ¹⁴ Na'ch wne' nad': “Chioza', beena' be'la'o dii xozxto'choka', ba wleje' li' kwenṅche gombi'o daa cheenile' gono', na' kwenṅche ble'ilo' beena' nak liizelozī beṅ' wen, na' benteilo' kwine'n ba bshaljlēne' li'. ¹⁵ Na' li' wi'o xtilleena' doxen yell-lioni, na' we'lēno' beṅ' dill' yog'lol diika' ba ben ble'ilo'. ¹⁶ Na' ṅaa, bibi wsej wllonan choatego' nisa' na' wṅabi Xancho Jesúsza' yisol yinīte' saaxya cho'ka'.”

¹⁷ Na' ka biyed' Jerusalénni, wyaa yoodo'na' je'lwill' Chioza', na' Chioza' bene' ka ble'do'id'. ¹⁸ Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtilaana' daa we'lengako'ne'." ¹⁹ Na'ch chepee: "Xan', legake' nezgakile' ka wya' to to gana' chdop chllagnto' choe'lwillnto' Chioza' jexaa beñ'ka' nonlilall' li', na' bet wdingakee na' biche'gakee ni, bsejgakee lillyana'. ²⁰ Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa beñ'ka' bet le'." ²¹ Na' Jesúza', beena' nak Xan', wne' nad': "Wloo nez, wyaj yell zit'ka' na' je'len beñ'ka' bi nak beñ' Israel xtilaana'."

Páblona' goke' lo na' beñ' wñabia' che soldadka'

²² Zeelo diika'z bzenaggake' che Páblona', na'ch wzolo chosyaagake' che'gake':

—¡Bisol binittegue' yell-lioni! ¡Aga chiya! soach ka le'!

²³ Na' bikzə bsangake' chosyaagake' daa le chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə. ²⁴ Na' beñ' wñabia' che soldadka' bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa beñ'ka' le'. ²⁵ Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to beñ' nde kwent Rómana' la'kzi bin' yiyiljyoll-le bin bene'?

²⁶ Na' ka goll Páblona' xan soldadka' ka', na'ch jelle' beñ' wñabia' che'ka':

—Wsak'shkilo', nde beeni kwent yell Rómana', na.

²⁷ Na' beñ' wñabia' che soldadka' wyaje' kwit Páblona' na' wñabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

²⁸ Na'ch beṅ' wṅabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

²⁹ Na' daa goll Páblona' ka', beṅ'ka' nan wit chin-gake'ne' lii bikwastegake' kwite'na'. Na' axt beena' chṅabia' soldadka', ka gokbe'ile' Páblona' ndie' kwent yell Rómana', le bblebe' daa bene' mandad bchejgake'ne' gdenka'.

Bzegake' Páblona' lao beṅ'ka' chṅabia' beṅ' Israelka'

³⁰ Na' betiyo, beṅ' wṅabia' che soldadka' btope' bṅozka' chṅabia' na' yog'lol beṅ'ka' chṅabia' beṅ' Israelka'. Na' bselle' gdenka' daa nchej ni'a na' Páblona', na' wleje'ne' bzie'ne' lao beṅ'ka' daa cheenile' inezile' biḱhe chao beṅ' Israelka' xya che'.

23

¹ Na'ch Páblona' bwie' beṅ'ka' chṅabia' beṅ' Israelka' na' golle' legake':

—Le' beṅ' bish', nezi yichjlall'dawaani axt naa chon' daa chazlall' Chioza'.

² Na'ch Ananíaza', beena' nak bṅoz choo bṅoz xen, golle' beṅ'ka' ze kwit Páblona' kwall'gake' cho'ena'. ³ Na' Páblona' golle'ne':

—¡Chioza' wit chine' li', wxiye'! Li' chi'oni kwenche yiya yiyiljo' nad' kon ka na leya', per chyishjo' daa na leya' daa beno' mandad wllall'gake' cho'ani.

⁴ Na'ch beṅ'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak bṅoz choo bṅen che Chioza'?

⁵ Na'ch Páblona' golle' legake':

—Le' ben' bish', bi nezid' shi len' b̄xoz choo b̄xoz xenna'. Shel'ka' nezid', aga goshee ka', la' Cho'a Xtill' Chioza' nan: “Bi inio' zban to ben' w̄nabia' che yell cho'na'.”

⁶ Na' Páblona' gokbe'ile' ben'ka' ch̄nabia' nakgake' ch̄op kwenl̄ə. Baḷe' nak txen saduceoka' na' baḷe' nak txen fariseoka'. Na'ch w̄nie' zillj chi'e:

—Le' ben' bish', nad' nak' fariseo na' naktia' xiin' fariseo. Na' chaole xya cha' daa non' lez yiban ben' wetka'.

⁷ Ka goll Páblona' ka' na' gok to wishesh wal ladj fariseoka' len saduceoka'. Na' gokgake' ch̄opl̄ə. ⁸ La' saduceoka' nagake' aga wibanch ben' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban ben' wetka'. ⁹ Na' yog'gake' besyaagake' choe'gake' wde wdeli dill'. Na'ch wzolla' baḷ ben'ka' chli' chsedi leya' nakgake' txen fariseoka', na' che'gake':

—Ni to dii mal bin' gon beeni. Shera shi to ben' bi gak ile'icho wa to anjlan' ba w̄nie' le'. Bi chiyal' soshiy'cho Chioza'.

¹⁰ Na' daa zi'tel̄ə gokdil'-len ljwell ben'ka', bxolli ben' w̄nabia' che soldadka' wxoxj wtingake' Páblona'. Na'ch w̄nie' soldadka' yibejgake' Páblona' ladje'ka' na' lljaloogake'ne' dii yobl̄ə gana' zoa lille'ka'.

¹¹ Na' llana' sto ka gol, bli'lao X̄ancho Jesúsza' Páblona' na' golle'ne':

—Bendiplaloo Pablo, ka ba be'kzo' xtillaana' Jerusalenni, ka'kzan chonan byen lljeno' Rómana'.

Chgoogake' x̄nezin witgake' Páblona'

¹² Na' betiyo baḷ ben' Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak bin' witgake'ne'. ¹³ Wdeli choa ben'ka'

wloo cho'agake' witgake' Páblona'. ¹⁴ Na'ch wyajgake' lao b̄xozka' ch̄n̄abia' na' lao beñ' gol che'ka' ch̄n̄abia' beñ' Israelka' na' jellgake':

—Ba b̄chebnto' wsak'zi' Chioza' neto' shi yeej gaoznto' na' biñ' witnto' Páblona'. ¹⁵ Na' le' nakle beñ' w̄n̄abia' ch̄ento', li gak toz na' li in̄abi beñ' w̄n̄abia' che soldadka' kweje'ne' w̄xe na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

¹⁶ Na' bi' che beñ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. ¹⁷ Na' Páblona' w̄nie' to beñ' nak x̄an to guioa soldadka', golle'ne':

—Jwa'gach bi'ni lao beñ' w̄n̄abia' che soldadka', la' de to dii ye'b' le'.

¹⁸ Na' x̄an soldadka' jweeb' lao beñ' w̄n̄abia' che yog' soldadka', na' golle'ne':

—Páblona', beena' nej lillyana', w̄n̄abile' nad' yidwa' bi'ni lawo'ni, la' de to dii in̄ab' li' na.

¹⁹ Na' beñ' w̄n̄abia' che yog' soldadka' bexee na' bi'na', na' b̄chi'eb' ga kono lle'. Na'ch w̄n̄abile'b':

—¿Beran cheenilo' ino' nad'?

²⁰ Na' bi' xkwidaa gollb' le':

—Beñ' Israelka' ba gokgake' toz kwenche in̄abgak-ile' li' kwejo' Páblona' w̄xe na' wseloone' lao beñ'ka' ch̄n̄abia' legake', na' wda'tezgakile'n yiyiljyollgake' berakzan bene'. ²¹ Na' bi shajli'o ch̄egake', la' wdeli choa beñ'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgake' na' biñ' guete'. Na' ba chbezgake' gono' ka cheengakile'.

²² Na'ch beñ' w̄n̄abia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

Bsel'gake' Páblona' lao ben' wñabia'na' le Félix

²³ Na'ch ben' wñabia' che soldadka' wñie' chop xan soldad che'ka' na' bene' mandad wzenagakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyogake' shajgake' ni'azgake', na' giyonshigake' kwiagake' kabay na' zi chop guiyogake' gox'gake' lanza. ²⁴ Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix', beena' chñabia'. ²⁵ Na'ch bgoxee legake' to yish dii na ki:

²⁶ “Si'xengacho' ben' wñabia' Félix, nad' Claudio Lisias chzej' li', na' chwap' li' chiox. ²⁷ Ka nak beeni chselaa lawo'na', ben' Israelka' bex'gake'ne' na' ba zoa witgake'ne' shel' ki nad' jasla'ne' len soldad cha'ka', la' wnezid' ndie' kwent yell Rómána'. ²⁸ Na' daa goklallid' inezid' berache chaogake' xya che', jwaane' lao ben'ka' chñabia' ben' Israelka'. ²⁹ Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. ³⁰ Na' ka wnezid' ben' Israelka' ba ngoogake' xnezin witgake'ne', bchoglallaa wselaaane' lawo'na'. Na' ba gosh' ben'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

³¹ Na'ch soldadka' lle' na' bche'gake' Páblona' zejlen-gake'ne', bllinlentegake'ne' yella' le Antípatris kon ka goll ben' wñabia' che'ka' legake'. ³² Na' betiyo, soldadka' zej ni'azgake' bibiigake' ziyajgake' Jerusalénna'. Na' ben'ka' llia kabayka' zejlenchgake' Páblona'. ³³ Na' ka bllingake' Cesareana', be'gake' ben' wñabia'na' yisha' nox'gake' na' bengake' Páblona' lo nee. ³⁴ Na' ka wde blab ben' wñabia'na' yisha', na'ch wñabile' Páblona' ga beñaan. Na' ka wnezile' Páblona' nake' ben' yell Tarso, daa llia gana' mbani Cilíciana', ³⁵ na'ch golle'ne':

—Na' wzenagshkid' bin ino' kat' yid ben'ka' chao xya cho'.

Na'ch bene' mandad lljasejgake'ne' yoonā' ben dii Heródeza', gana' chzoa ben' wñabia'ka'.

24

Be' Páblona' dill' lao Félixā'

¹ Gok gay' lla zoa Páblona' Cesareana' ka bllin b̄xoz choo b̄xoz xenna', beena' le Ananías, na' n̄chi'e baḷ ben' golka' chñabia' na' kon to ben' wide dill', ben' le Tértulo. Na' bllingake' lao beena' chñabia' kwenche gaogake' xya che Páblona'. ² Na'ch bdegake' Páblona' lao ben' wñabia'na' le Félix na' wzolo Tértulona' chawe' xya che', chi'e:

—Choxkeno' li', ben' wñabia', zoanto' mbalaz na' chak wen chento' lallnto'ni daa chak koo x̄nezi yog'loḷte kon yeḷ' sin' cho'na'. ³ Na' daan, gattez zoanto' toshiizi nanto' li' choxkeno' dii zan las, li' ben' wñabia'. ⁴ Na' kwenche bich wshayinto' li', chñabinto' li' gono' goklen wzenago' to chop ka nak dga inanto' li'. ⁵ Ka nak beeni ze lawo'ni, nezinto' nake' to ben' chbek dii zed, na' chdaze' doxen yell-lioni chta chñie' ben' kwenche neto' ben' Israel gaknto' chopl̄, na' ngoo lo nee x̄onj ben' chonlilall' to ben' Nazaret. ⁶ Ga biyollin, goklallee kwee loo yoodo'na' ben' bi nak ben' Israel. Daan bex'nto'ne'. ⁷ Na' wyaz ben' wñabia' che soldadka', beena' le Lisias, na' bigoyoe'ne' lo na'nto'na'. ⁸ Na' wne' neto' chiyal' yidnto' lawo'ni kwenche gaonto' xya che'. Na' kwino' naa, wak inabilo' Pábloni kwenche inezilo' bīche chaonto' xya che'.

⁹ Na' ben' Israelka' lle'lengake' na', bischopgake' dillaa che'gake': “Ka nakannan'.” ¹⁰ Na'ch ben' wñabia'na' bene' sen' lao Páblona' kwenche wi'e dill', na'ch wzolo Páblona' chi'e:

—Nezid' ba gok zan yiz chono' yel' joschis che ben'ki lle' gani mbanilo'. Daan chibaid' wi'a dill' daa chak cha' lawo'ni. ¹¹ Zi' gok shllin' lla billin' Jerusalénna' jaye'lawaa Chioza', na' shi cheenilo' gaktiyilo'n, wak inabo' kwenche xenlalloo ka nakannan'. ¹² Na' kono ble'i nad' chakdil-len' ben' wa chbekw' wdił wishesh ladj ben', ni loo yoodo'na' ni gan yoblə ga chdop chllagnto' choe'łwillnto' Chioza' ni gachli yella'. ¹³ Na' ka nak diiki na ben'ki cha', ni ton bi gongake' gan inagake' ka nakannan'. ¹⁴ Lete to dii wcheb' lawo'ni choe'lawaa Chioza', beena' be'la'o dii xoxto'nto'ka', kon ka nak nez li nez shao' che Jesucrístona' daa yo'a, daa na ben'ki bi zejan shli. Per chajli'a yog' daa na ley che Chioza' na' diika' bzej dii ben'ka' wdixjee daa golle' legake'. ¹⁵ Na' ka ben'ki chao xya cha' na' ka nad', toz ka nonnto' lez yisban Chioza' ben' wetka', ka ben' wen ka ben' mal. ¹⁶ Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao ben' yell-lioni.

¹⁷ 'Ba gok zan yiz chda' yell zit'ka', na' billin' Jerusalénna' kwenche wi'a mech dii gaklenan ben' wllall cha'ka' na' lekzka' wi'a bi dii wi'a yoodo'na'. ¹⁸ Na' diikin chon' ka biyoll bixi biyech' kon ka na leya', kat' to chop ben' Israel, ben' zaak Ásiana', ble'gakile' nad' yoodo'na'. Aga no ben' ntop nshag' na' ni to wdił wishesh bi mbek'. ¹⁹ Legaken' chiyal' yidgake' ni gaogake' xya cha' shi bin ble'gakile' chon'. ²⁰ Wa ben'ki zoa ni, inashkigake' shi bi dii mal billelgakile' cha' kana' jwa'gake' nad' lao ben' wnabia' chento'ka'. ²¹ ¿Awa shi daa besyaa goshgakee: “Chaozle xya cha' daa chajli'a wllin lla yiban ben' wetka'”?

²² Na' ka biyoll beni Félix'a wna Páblona' ka', na' bsane' bich bene' yel' joschis che'na', la' ba wnezile' nakan nak diika' chajle' ben'ka' yoo lo nez li nez shao' che Jesucrístona'. Na' golle' ben'ka':

—Kat' yid Lísiaza', beena' chñabia' soldadka', kana' inezyen'id' nakran nak dga chak chele.

²³ Na'ch Félixá' golle' xan soldadka' wseje' Páblona', per bi wllone' sho' ben'ka' nombia' le' na' llje'gake'ne' bi dii chyalljile'.

²⁴ Na' ka wde chop shon lla, bizllinlen Félixá' xooole'na' le Drusila, to nool Israel. Na'ch ben Félixá' mandad bllin Páblona' lawe'ka' kwenche wzenaggake' dillaa daa cho'e daa ne' chiyal' gonlilall'cho Jesucristona'. ²⁵ Na'ch be' Páblona' dill' chi'e chiyal' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félixá' xtilleena', le bllibe'. Na'ch golle' Páblona':

—Ba gokz to ka't', na' kat' gat' latj cha'na' inia' li' dii yoblə.

²⁶ Félixá' lekzka' goklallee we' Páblona' le' mech kwenche yisane'ne'. Daan zekizezi wñie'ne' kwenche be'lene'ne' dill'. ²⁷ Ka'z wde chop yiz, na' ka bichej Félixá' bich wñabi'e na' wyoo to ben' yoblə lie' Porcio Festo. Na' kwenche ile'shii ben' Israelka' Félixá', bi bisane' Páblona'.

25

Páblona' bi'e dill' lao Féstona'

¹ Na'ch ka bllin Féstona' Cesareana' kwenche inabi'e, na' wzoe' shon lla. Na'tech wzee wyaje' Jerusalénna'.

² Na' bñozka' chñabia' na' nochlə ben'ka' chñabia' ben' Israelka' ka wñezgakile' ba blline' Jerusalénna', na'ch jtaogake' xya che Páblona' lawe'na'. ³ Na' wñabgakile'ne' gone' to goklen yiselee Páblona' Jerusalénna' kwenche gak ye'l' joschis che'na'. Gollgake'ne' ka' daa goklall'gake' witgake'ne' tneza'. ⁴ Per goll Féstona' legake':

—Cesareana'zkwə yigaan Páblona', na' aga chllach yiyaa na'lə.

⁵ Na' golle' legake':

—Ben'ka' chnabia' le' chiya' sa'lengake' nad' Cesareana' kwenche gaole xya shi bi dii malan bene'.

⁶ Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yel' joschisa' na' bene' mandad jxi'gake' Páblona'. ⁷ Na' ka wyoo Páblona' gana' chi' Féstona' lii wbig'te ben' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'. ⁸ Na'ch Páblona' bzoa rson che', chi'e legake':

—Nad' ni tlish' dii mal bin' gon', ni bin' chishj' ley chento'na' neto' ben' Israel, ni bin' wnit' balaan che yoodo' chento'na', ni bigan' inia' zban che Césara' beena' chnabia'.

⁹ Na' daa goklall' Féstona' ile'shii ben' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' yel' joschis cho'na' na'lə?

¹⁰ Na' Páblona' chi'ene':

—Ba zia' lawo'ni, na' ben' wñabia' Césara' ba nzoe' li' ni kwenche gono' yel' joschis, na' nin chiya' gak yel' joschis cha'na'. Nezkzilo' aga bi ben' che ben' wlall' cha'ki. ¹¹ Shi ba ben' dii chon ka chido'laa guet', wakkzə guet'. Per shi bibi ben' che ben'ki chao xya cha', kono gak gon nad' lo na'gake'. Na' chnab' wdio' nad' lao ben' wñabia' Césara' kwenche kwine' gone' yel' joschis cha'na'.

¹² Na'ch Féstona', ka wde be'lene' dill' ben'ka' chaklen le' chone' yel' joschisa', na'ch chi'e Páblona':

—Ba wñabo' tio' lao ben' wñabia' Césara' kwenche gone' yel' joschis cho'na', na' wselaa li' lawe'na'.

Páblona' bi'e dill' lao ben' wñabia' Agrípana'

¹³ Na' gok chop shon lla na'ch bllin ben' wnabia' Agrípana' len Berenícena' yell Cesareana' jawapgake' Féstona' chiox. ¹⁴ Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to ben' bi ben Félix'a yel' joschis che'na'.
¹⁵ Ka wya' Jerusalénna', ben' wnabia' che b_xozka' na' ben' golka' chnabia' ben' Israelka' wdaogake' xya che' lawa'na', goklall'gake' wchogbi'a guete'. ¹⁶ Na' gosh'gakee ka choncho cho' ben' Roma, aga lii wchogbia'tezcho guet to ben' shi bi sie' wzoa rson che' lao ben'ka' chao xya che'.
¹⁷ Daan, ka bid ben'ka' bidtao xya che', bi bshe'ida'n, san betiyo'z lii bentia' wneyi jxi'gake'ne' kwenche gon' yel' joschis che'na'. ¹⁸ Na' ben'ka' bidtao xya che', ni tlish' diika' wza'lallaa bene' bi wnagake'. ¹⁹ Daa zeelo nagake' che', nlla'lə chajli'e che Chioza' na' chde' cho'e dill' che to ben' wle Jesús, beena' ba wit, na' le' ne' mbankze'. ²⁰ Na' daa bi nezid' nak gon' yel' joschis che ben'ki, wnabid' le' shi cheenile' yiza'lene' nad' Jerusalénna' kwenche gak yel' joschis che'na' na'. ²¹ Per Páblona' wnabe' tie' lao César Augústona' kwenche gone' yel' joschis che'na', na' ben' mandad shejze' axt kat'ch gak wselaa'ne' Rómána'.

²² Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

²³ Na' betiyo bllin Agrípana' lega ben' zakii, len Berenícena' na' len bal ben'ka' chnabia'gake' soldadka', na' ben'ka' mbejlawin yella'. Na'ch Féstona' bselee ben' jxi'gake' Páblona'. ²⁴ Na' wne Féstona', chi'e:

—Li' ben' wnabia' Agripa, na' yog'le le' lle'le ni, ka nak beeni ze ni, yog' ben' Israelka', ka ben' lle' Jerusalénna' na' ka ben' lle' Cesareani, chaogake' xya che', na' chongake'

byen chogbi'a guete'. ²⁵ Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wnabe' tie' lao César Augústoná' kwenche gone' ye'l' joschis che'na', na' ba bcheb' wdia'ne' na'lə. ²⁶ Per bi chillelid' bin ben Pábloni kwenche wzej' Césara' yepée bin bene'. Daan ba nzia'ne' laoleni na' lawo'niyen'kzə li', ben' wnabia' Agripa, kwenche inabyollichone' bin bene', na' ka' wllia' lee yisha'. ²⁷ La' chakid' bi nakan wen wselaa to ben' lawe'na' kwenche wchogloe' che' na' bi nzej' bin bene'.

26

Páblona' bzoe' rson che' lao Agrípana'

¹ Na' Agrípana' golle' Páblona':

—Bzoashki rson cho'na' naa.

Na'ch Páblona' blis neena' na' wzoloe' bi'e dillaa, chi'e:

² —Li' ben' wnabia' Agripa, mbalaz wal chakid' daa gak wzoa rson cha'ni lawo'ni che yog' diika' chao ben' Israelka' xya cha'. ³ La' nezkzilo' ka yoolo neto' ben' Israel chonnto', na' lekzka' che dil chix chento'ka'. Daan chnab' gapgacho' ye'l' chxenlall' na' wzenaggacho' ka nak dga inia' li' naa.

⁴ Yog'lo ben' Israelka' nezgakile' ka bsa' cha' ladje'ka', ka yell cha'na' gana' bgol' na' ka Jerusalénna'. ⁵ Na' lekzka' nezgakile' toshiizi nak' toz fariseoka', ben'ka' chzenagchgake' che ley che dii Moiséza' aga ka nochlə ben' yoblə. Na' wak yizi' cho'agake'n shi gueengakile'.

⁶ Na' naa chaogake' xya cha' daa non' lez wllin lla gon Chioza' ka bchebe' lao dii xozxto'nto'ka'. ⁷ Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la' onto' Chioza' ka tella ka wal. Na' daa non' lez gak daa bcheb Chioza', daan

chao ben' Israelki xya cha', li' ben' wñabia'. ⁸ ¿Berache bi chajle'le wak yisban Chioza' ben' wetka'?

Páblona' bi'e dill' ka bsak'zi'e ben'ka' nonlilall' Jesúza'

⁹ 'Lekzka' nad' gokid' chiyal' wsak'zi'a ben'ka' nonlilall' Jesús, ben' Nazareta'. ¹⁰ Na' ka' ben' Jerusalénna'. Na' b̄oxka' chñabia' bengake' lsens wlo'a lillyana' ben'ka' nonlilall' Jesúza', na' ka betgake' legake' lekzka' len' chakid' kan' chiyal' gak. ¹¹ Zan shii wya' gana' chdop chllagnto' choe'lwillnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', axt yell zit'ka' wya' jasak'zi'gakee.

Sto shii be' Páblona' dill' ka gok blla' yichjlall'do'ena'

(Hch. 9:1-19; 22:6-16)

¹² 'Na' lekzka' nan lljenid' ben'ka' nonlilall' Jesúza' yell Damáscona', na' b̄oxka' chñabia' bsel'gake' nad' na' bengake' lsens lljasak'zi'gakee. ¹³ Na' ki gok cha', li' ben' wñabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbillla', na' wyechjan nad' len ben'ka' zyaalen'. ¹⁴ Yog'tento' wzoatishnto' lo yona', na'ch nad' benid' shii to ben' wñie' nad' dill' hebreo, ne': "Saulo, Saulo, ¿berache chchi' chsak'zo' nad'? Daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b." ¹⁵ Na'ch wnia', chepee: "¿Nora li', ben'?" Na' wne': "Nadaan Jesúza', beena' chchi' chsakoo. ¹⁶ Na' naa biyas. Ba bli'law' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'. ¹⁷ Na' wselaa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'. ¹⁸ Na' wselaa li' kwenche lljali' lljasedilo' legake' kwenche sho' beeni' cha'na' loo yichjlall'do'eka' na' bich tagake' lo yel cho'la'. Gono' ka

bich in_{ab}ia' Satanáza' legake', san gon_{lil}all'gake' Chioza' na' gon_{lil}all'tegake' nad' na' yizi'xen' xto_{le}eka'. Na' lengake' ikaagake' daa we' Chioza' be_n'ka' nak lall' nee.”

¹⁹ 'Kan' gok cha', li' be_n' w_nabia' Agripa, na'chan bzenag' daa wna Jesúza' ka bli'lawe' nad'. ²⁰ Na' zigaate be_n' Damáscoka' bli' bse_{did}' cho'a x_{till}' Jesucrístona', na'tech be_n' Jerusalénka', na' be_n' lle' doxen yell-lío Judeana', na' lekzka' be_n'ka' bi nak be_n' Israel. Gosh'gake' chiyal' yiyaj yileni che xto_{le}eka' na' wzenaggake' che Chioza', na' gongake' ka gakbe'i be_n' nan ba biyaj bilengakile'. ²¹ Na' ni cheyi diikin, be_x' be_n' wlall cha'ka' nad' yoodo'na' na' nan witgake' nad'. ²² Per Chioza' chaklene' nad' kwenche choe'ch' x_{till}leena' lao be_n' a_{xt} naanlla, ka lao be_n' zakii na' ka lao be_n' bi zakii. Na' kon ka wnakz dii Moiséza' gak na' ka wnakzə dii be_n'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'. ²³ La' legake' wnagake' Chioza' nllie' bia' Crístona', beena' wse_{lee}, yiya dii yen ile'ile' na' witgake'ne', na' len' gake' be_n' necha' yibane' ladj be_n' wetka', na' chixje'ile' be_n' Israelka' na' be_n'ka' bi nak be_n' Israel nakan chiyal' gongake' kwenche sho' beeni' che'na' loo yichj_lall'do'eka'.

Páblona' goklallee gon_{lil}all' Agrípana' Jesúza'

²⁴ Na' shlak Páblona' chzoa rson che'na', besyaa Fés-tona', chi'ene':

—¡Chaktonto'n, Pablo! Daa zi'telə chsedo' ba chontontin li'.

²⁵ Na' Páblona' chi'ene':

—Aga chaktonta'n, be_n'do', san dill' l_{in} cho'a, na' nakan dii shaj_{le}'cho. ²⁶ Na' be_n' w_nabia' Agrípani nezile' che yog' diiki nia' le', daan chiyaxjid' cho'a dill' lawe'ni. Aga inacho bi nezile' diika' gok, la' ga lle' lla' be_naan gokan. ²⁷ Na' li', be_n' w_nabia' Agripa, ¿achajli'o cho'a

xtill' Chioza' daa bzej dii ben'ka' wdixjee daa golle' legake' kani'yi? Nad' nezid' chajli'o.

²⁸ Na'ch Agrípana' chi'e Páblona':

—¿Achakilo' xtitz wshaljleno' nad' cho'a xtill' Jesúza' na' gonlilallaane'?

²⁹ Na'ch Páblona' chi'ene':

—La' xtitzə wa la' ssha wshaljlen' li', Chioza' wi'e latj aga tozo' li' shajli'o san yog' ben'ki lle' ni chengakile' dillii cho'a shajle'gake' ka ba wyajli'a nad', per aga nia' wchejgake' legake' gden ka nchejgake' nad'.

³⁰ Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' ben'ka' wche'lengake'. ³¹ Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiyal' gatee lillyana'.

³² Na'ch Agrípana' golle' Féstona':

—Wak yislacho beeni shel'ka' ki ba wñabe' tie' lao ben' wñabia' César'a' kwenche gone' yel' joschis che'na'.

27

Bsel'gake' Páblona' yell Rómana'

¹ Na'ch ka bchoglall'gake' wsel'gake' neto' Itáliana' loo barkwlə, bengake' Páblona' kon sto chop pres yoblə lo na' beena' le Julio, nake' xan to guiyoa soldadka' ben'ka' nzi' soldad che beena' chñabia' Rómana'. ² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to ben' le Aristarco neto'. Nake' ben' Tesalónica, daa llia gana' mbani Macedóniana'. ³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' ben'ka' nombi'e yella' kwenche be'gake'ne' bi dii byalljile'. ⁴ Na' ka biza'nto' Sidonna' na' wdeteznto' yichjlə yell-lío Chíprena' daa llia lo nisdona' kwenche

bkweejan neto' daa le ze be'na'. ⁵ Na' wdetento' lo nido'na' daa de tcho'a yell-lio gana' mbani Cilíciana' na' Panffliana', na' bllinnto' cho'a yell Mírana', daa llia gana' mbani Líciana'.

⁶ Na' yell Mírana' xan soldadka' bllelile' to barkw dii za' Alejandríana' na' zejan Itáliciana', na' bidie' neto' lo'inna'. ⁷ Na' zan lla wyajlennto' barkwa' sho'lall'zə, na' kañi bllinnto' cho'a yell Gnídona'. Na' daa ze be'na' klelə, na' wyeçhnto' yell-lio Crétana' daa llia lo nido'na', wdeteznto' cho'a yell Salmónna'. ⁸ Na' kañi gok zejnto' tcho'a nido'na' axt ni bllintento' gana' le Buenos Puertos, gaozə yell Laseana'.

⁹ Zan llate ba wllainto' na' ba chonan dii nxoll shajchnto' lo nido'na' daa ba zoa yilen dii zaga'. Na' goll Páblona' legake':

¹⁰ —Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹ Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'. ¹² Na' daa bi nak latja' wen yigaannto' na'z shlak chi' dii zaga', zangake' bçhoglall'gake' shajchnto' kwenche' illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nido'na'

¹³ Na'ch wzolo ze to be'les dii za' lli'lə, na' beñ'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lio che Crétana' daa llia lo nido'na'. ¹⁴ Ka gok shloll, wzolo to be' wal dii za' cha'lə. ¹⁵ Na'ch wzolon chlligaan barkwa' na' bikzə bi gok gonnto', na' bsanlall'choklento'n nllig' be'na' len. ¹⁶ Na' ka wdento' gaozə

to yell-liodo' le Clauda daa llia lo nido'na', na' bich zetek be'na'. Na'ch barkwdo'na' ngoyo barkw xenna' bilepnto'n loo barkw xenna', per kañi gokan. ¹⁷ Na' ka biyoll bilepnto'n, na'ch bchejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len. ¹⁸ Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bzal'gake'n loo nido'na' kwenche bichtek gok barkwa' zii. ¹⁹ Na' ka gok shon lla, axt len xshinlaz barkwa' bzal'nto' loo nido'na'. ²⁰ Na' zan lla bi bli'lao wbillla' ni beljka', na' daa zechga be'na', bich bennto' lez yilanto'.

²¹ Na' ka ba gok zan lla biñ' gaonto', na'ch Páblona' wzie' ladj ben'ka' na' chi'e legake':

—Sheł' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, sheł'ka'. ²² Na' naa bikzə gonchoplall'zle, la' ni tole bi guet. Toz barkwi kwiayi'. ²³ La' daa nll'e'yi Chios cha'na' beena' chonlilallaa bselee to anjl bli'lawe' nad'. ²⁴ Na' anjla' wne' nad': “Bi illebo' Pablo. Chonan byen illino' lao ben' wñabia' Césara', na' ni cho' li' yiyesh'lallii Chioza' yog' ben'ka' zejleno' txen loo barkwi na' bi guet-gake'.” ²⁵ Na' naa, li wtiplall'le, la' nxeñilallaa Chioza' na' nezyenid' kon ka wna anjla' nad' kayen'nan gak. ²⁶ Per chonan byen wwiacho naklə goncho kwenche yichoonan cho' to lo yell-liodo' dii llia lo nido'ni.

²⁷ Na' ba gok shda' wbill ka bllinnto' gana' de Nido' Adriáticoná', na' ni chllig' be'na' barkwa' to ki to ka'lə lo nido'na'. Na' ka bllin chel, ben'ka' chsa' barkwa' gokbe'gakile' ba chllinnto' gana' de yo billa'. ²⁸ Na'ch bletjgake' to ya kwenche bchixgake' ka'k' zitj nisa', na'

ka bchixgake'n zitjan shin'toyichoa metr. Na'ch ka wza'n zilat' na'ch bizchixgake'n dii yoblə na' zitjan gallichoa metr. ²⁹ Na' daa bblebgake' lljsho' barkwa' lee yajka', bletjgake' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te. ³⁰ Na' ben'ka' chsa' barkwa' gokgakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'. ³¹ Na'ch Páblona' golle' xan soldadka' na' soldad che'ka':

—Shi ben'ki bich yigaangake' loo barkwi, aga wilalat'le shi naa.

³² Na'ch soldadka' bchoggake' rietka' daa nchej barkwdo'na' na' bxopan loo nisa'.

³³ Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble. ³⁴ Na' nia' chonan byen gaolat'le kwenche yiyakshao'lall'le, la' ni tole bi kwiayi'.

³⁵ Na' ka biyoll wna Páblona' ka', na' bexee to yetxtil na' bi'e Chioza' yel' choxken lao ben'ka' lene' na' bxoxje'n na' wzoloe' chawe'. ³⁶ Na' ka ble'gakile' chawe', na'ch yoguee bendiplall'gake' wdaogake'. ³⁷ Yog'lol' neto' yoonto' loo barkwa' naknto' chop guiyoa guiyonshin'to. ³⁸ Na' ka beljgakile', na'ch bza'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa' yel

³⁹ Na' ka wyeeni', ben'ka' chsa' barkwa' aga biyombia'gake' yell-liona', per ble'gakile' to ladj lchi ga choo xoz' nisa' gana' gokgakile' wak sho' barkw che'ka'. Na' bchoglall'gake' lljlekwgake'n lo yoxa'. ⁴⁰ Na' bchoggake' riet che ya xenka' daa chzagaan barkwa' na' wchoonlall'gake'n loo nisa'. Na'ch bisellgake' yaga' daa chaklanan chzechj chlliin barkwa', na' bizeshgake'

lechaa daa ze yichjinna' kwenche bllig' be'na'n, na' wzolo barkwa' zjabinnaan cho'a nisa'. ⁴¹ Na' jshia xin' barkwa' to ga zoayaa yoxa' loo nido'na' na' gogaan, na' aga gokch yichejan. Na'ch bli che nido'na' wzolon bxoxx btinan xan barkwa'. ⁴² Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. ⁴³ Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate ben'ka' chak xoa yela' wxit'gake' loo nisa' kwenche yillingake' lo yo billa', ⁴⁴ na' ben'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lo'nto' billinnto' shi'a shao' lo yo billa'.

28

Páblona' wzoe' Máltana'

¹ Na' ka biyoll billin yog'nto' shi'a shao' lo yo billa', na' wnezinto' yell-liona' len Malta. ² Na' ben'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'. ³ Na'ch Páblona' btope' xonj xis bill, na' ka bzaleen lo yi'na' bichej to bel ladjinna' na' wdinyaab neena'. ⁴ Na' ka ble'i ben' Máltaka' nal' bel' na' Páblona', na'ch che' ljwelle':

—Ben' wen xyalja beeni. La'kzi bile' lo nido'na', Chioza' aga wi'e latj ibane'.

⁵ Na'ch Páblona' wllib neena' kwenche bxop bel' lo yi'na', na' aga bi gokile'. ⁶ Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷ Na' gaozə gana' bllinnto' de yell-lio che beena' chnabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'. ⁸ Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoə neena' yichje'na' na' biyakile'. ⁹ Na' ka wnezi ben' Máltaka' daa ben Páblona', na'ch wyaj yog' ben'ka' bi shao' lawe'na' na' biyakgakile'. ¹⁰ Na' ben'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómána'

¹¹ Shon beo' wzoanto' Máltana'. Na' ka biza'nto' biy-oonto' to loo barkw dii bchej Alejandríana' daa lekzka' bi-gaan Máltana' shlak wde dii zaga'. Na' xin' barkwa' da' chop lwaa lsak' chios che ben' griegoka', ben'ka' le Cástor na' Pólux. ¹² Na' ka bllinnto' yell Siracúsana', na' wzoanto' shonə lla. ¹³ Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'. ¹⁴ Na' Puteólina' billagnto' bal ben'ka' nak neto' txen chonlilall'nto' Jesúza', na' wnabigake' neto' yigaanlennto' legake' to xman. Na' ka wde xmanna', na'ch biza'nto' zejnto' Rómána'. ¹⁵ Na' ben' Rómaka' nonlilall' Jesúza', ka wnezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shon Yoo Ga Chigaan Ben'. Na' ka ble'i Páblona' legake', bi'e yel' choxken Chioza' na' biyondiplallee. ¹⁶ Na' ka bllinnto' Rómána', xan soldadka' bene' preska' lall' na' beena' chnabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

Páblona' bi'e xtill' Jesúza' Rómána'

¹⁷ Na' ka gok shon̄ lla zoa Páblona' na', na'ch goxe' ben̄' Israelka' zakii, ben̄'ka' lle' Rómana'. Na' ka bdopgake' na' golle' legake':

—Le' ben̄' bish', shlak wzoa' Jerusalénna' ben̄' wllall chechoka' lle' na' bex'gake' nad' na' bengake' nad' lo na' ben̄' Rómaki la'kzi aga bi ben' chegake' na' bin̄' chishj' diika' wna dii xoxto'choka' chiyal' goncho. ¹⁸ Na' biyoll w̄nabyollgakile' nad' bin ben', ben̄' w̄nabia'ka' gokllall'gake' wsangake' nad', la' aga bi ben' kwenche w̄chogbia'gake' guet'. ¹⁹ Per ben̄' wllall chechoka' lle' Jerusalénna' aga be'gake' latj yisangake' nad'. Na' benan byen w̄nab' tia' lao ben̄' w̄nabia' Césara' kwenche gone' yel' joschis cha'na'. Per aga gaw' xya daa ben ben̄' wllall chechoka' cha'. ²⁰ Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' ben̄' Israelan, n̄chejgake' nad' gdenki.

²¹ Na'ch che'gake' Páblona':

—Aga bin̄' yish ila' laonto'ni dii za' Judeana' dii we'n dill' cho'. Na' ni to ben̄' wllall chechoka' bin̄' ila' biz gon inagake' cho'. ²² Na' cheeninto' wzenagnto' bi dillaan wi'o, la' nezinto' doxenz ch̄negake' zban che ben̄'ka' nakgake' txen dii koba' chliile.

²³ Na'ch bzoagake' to lla kwenche idopgake'. Na' ka bllin llana' bllia'gake' bia', ben̄' zan bdop gana' zoa Páblona'. Na' be'lene' legake' dill' do lla, bzajniile' legake' che yel' w̄nabia' che Chioza'. Na' bene' to dii byen kwenche shajle' ben̄'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii ben̄'ka' wdixjee daa goll Chioza' legake'. ²⁴ Na' baļe' wyajle'gake' diika' goll Páblona' legake', na' zi baļe' bi wyajle'. ²⁵ Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xoxto'choka' chi'e legake':

²⁶ Wyaj na' jellsha ben' Israelka':

La'kzi wzenagle bi shajni'kzile

Na' la'kzi chle'teile bi gakbe'kzile bin zejín.

²⁷ Bikzə bi rson chazle, daa naklikzle lall'do' wal,

na' chonle ka kwell lchol,

ni bi cheenile wzenagle,

ni bi cheenile ile'ile,

na' ni bi cheenile shajniile

kwenche yiyaj yilenile

na' gon' ka yiyakshao' yichjlall'do'lena'.

²⁸ Chiyal' inezile Chioza' ba ngwee xnezi yisle' ben'ka'

bi nak ben' Israel kwenche bi kwiayi'gake', na' lelgake' wlebgake' cho'a xtilleena'.

²⁹ Ka biyoll goll Páblona' legake' ka', na'ch ziyajgake' chakdil-len ljwellgake'.

³⁰ Chop yizyen' bigaan Páblona' yooná' gana' wdixje', na' blebe' nottezə ben' jawia le'. ³¹ Na' aga no bsej

bllon bzajnií Páblona' ben'ka' nakan nak yel' wñabia' che Chioza' na' bli' bsdile' ben' cho'a xtill' Xancho Jesucrístona'.

Dill' wen dill' Kob Che Jesucristona'

New Testament in Zapotec, Cajonos (MX:zad:Zapotec, Cajonos)

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
